



安徽通志

ル 5  
1575  
2



門九  
1873  
2



重修安徽通志卷一

皇言紀

世祖章皇帝詔諭

順治元年

奉

天承運

皇帝詔曰我國家受

天眷祐肇造東土

烈祖邁圖鴻緒

皇考彌廓前猷遂舉舊邦誕膺

新命迨朕嗣服雖在冲齡締念紹庭永綏厥位頃緣賊氛洊熾極禍

明朝是用託重親賢救民塗炭乃方馳金鼓旋奏澄清既解倒懸非

重修安徽通志

卷一

富天下而王公列辟文武羣臣暨軍民耆老合詞勸進懇切再三乃於今年十月初一日祇告

天地

宗廟

社稷卽皇帝位仍建有天下之號曰大清定鼎燕京紀元順治緬惟峻命不易創業尤艱況當改革之初更屬變通之會爰乃酌今準古揆天時人事之宜庶幾吏習民安彰

祖功

宗德之大所有合行條例臚列如左

順治二年江南臣附天下蕩平

詔曰光岳合而泰階平南北一而兵爭息越稽往古靡不同符本朝立國有年幅員旣廣醇樸爲治無意并兼向來疆場構兵本欲言歸於

好不期寇凶極禍明運永終於是整旅入關代爲雪恥猶以賊渠未殄不遑起居隨命二王誓師西討而南中乘釁立君妄僭尊號罔聞國郵亟行亂政重困民氓負四海不義之名阻東南向化之路朕用是夙夜祇懼思救熒黎故西賊旣摧旋行南伐上託

祖宗之休烈定國大將軍豫王扶義而東兵無頓刃河南河北次第歸誠甫克維揚隨平江左金陵士女紹我

天休旣獲福藩南土略定從此輕徭薄賦可漸進於昇平將來制度考文冀徐興於禮樂朕念峻命之不易悼斯民之孔艱深切痼瘵宜矜誑誤特宏大賚嘉與維新所有河南江北江南浙江等處地方合行恩例具列於後於戲陟禹跡而方行大統斯正撫殷遺而若保天下爲家旣定亂而安民惟更化而善俗敬敷朕志式慰輿情有幹有年仍服先疇之樂利無反無側共遵王道之蕩平布告多方想宜知悉

上諭本朝平定江南其土田規則悉用前明之舊恭紀食貨志田賦

順治五年

詔直省鄉試副榜諸生恭紀選舉志謹增

順治六年

上諭自兵興以來地多荒蕪民多逃亡流離無告深可憫惻著戶部都察院傳諭各撫按轉行道府州縣有司凡各處逃亡人民不論原籍別籍必廣加招徠編入保甲俾之安心樂業查本地方無主荒田州縣官給以印信執照開墾耕種永准為業俟耕至六年之後有司官親察成熟畝數撫按勘實奏請奉旨方議徵收錢糧其六年以前不許開徵不許分毫僉派差役如縱容衙官衙役鄉約甲長借端科害州縣印官無所辭罪務使逃民復業田地開墾漸多各州縣以招民設法勸耕之多寡為優劣道府以善處責成催督之勤惰為殿最每

歲終撫按分別具奏載入考成該部院速頒速行增謹

順治九年

旨江南賦稅各項本色恭紀食貨志田賦

救督撫按視災傷恭紀食貨志調賑

順治十二年

旨各府州縣積貯備荒恭紀食貨志儲積

上諭吏部朕撫育萬方夙夜祇懼講求愛民之道不啻三令五申乃年來水旱相尋干戈未靖民窮莫極兵食不充上德弗宣下情壅塞所致此弊非一端朕已廣開言路博詢化理復念天下至大民情土俗所在不同地方各官身親實歷凡兵民疾苦政事利弊必有灼知於心耳聞目見最為真切今文官自督撫以下知府以上武官自提督總兵以下副將以上管轄之內職掌事宜向來積弊何以得清現

今整頓如何而可俱著詳切直陳無隱以資採用司道知府副將各陳奏一次知其病即備其藥言其害即舉其利毋得浮泛雷同苟且塞責負朕周諮勤民至意爾部即傳諭行特諭

上諭禮部朕惟帝王敷治文教是先臣子致君經術為本自明末擾亂日尋干戈學問之道闕焉未講今天下漸定朕將興文教崇經術以開太平爾部即傳諭直省學臣訓督士子凡理學道德經濟典故諸書務要研求淹貫博古通今明體則為真儒達用則為良吏果有此等實學朕必不次簡拔重加任用又念先賢之訓仕優則學仍傳諭內外大小各官政事之暇亦須留心學問俾德業日修識見益廣佐朕右文之治特諭

順治十三年

詔蠲錢糧

恭紀食貨志蠲賑

上諭禮部朕惟治天下必先正人心正人心必先黜邪術儒釋道三教並垂皆使人為善去惡反邪歸正遵王法而免禍患此外乃有左道惑眾如無為白蓮聞香等教名色起會結黨夜聚曉散小者貪圖財利恣為姦淫大者招納亡命希謀不軌無知小民被其引誘迷罔顛狂至死不悟歷考往代覆轍昭然深可痛恨向來履行禁飭不意餘風未殄墮其邪術者實繁有徒京師輦轂重地借口進香張幟鳴鑼男女襍糅喧填衢巷公然肆行無忌若不立法嚴禁必為治道大蠹雖倡首奸民罪皆自取而愚蒙陷網罹辟不無可憫爾部大揭榜示今後再有踵行邪教仍前聚會燒香斂錢號佛等事在京著五城御史及地方官在外著督撫按道有司等官設法緝拏窮究奸狀於定律外加等治罪如或徇縱養亂爾部即指參處治特諭

順治十六年

御製

欽頒人臣做心錄序

朕惟人臣立身制行本諸一心心正則爲忠爲直眾美集焉不正則爲姦爲慝羣惡歸焉是故心者萬事之本美惡之所由出也顧事有殊塗心惟一致一於國則忘其家一於君則忘其身如此者不特名顯身榮邦家亦允賴之矣若夫姦邪之流樹黨營私怙權亂政卒致身名俱喪爲國厲階蓋緣居恆無正心之功一當勢利遂昏迷昏亂狂肆驕矜上昧王章下乖臣誼或作威而聯羽翼或比匪而效奔趨如譚秦石漢以累世舊臣久叨恩遇不思圖報逞臆橫行跋扈自恣目無綱紀陳名夏則一介豎儒驟蒙顯拔倚任深重賜賚優隆而乃背德植交蔑法罔上此皆自作罪孽以致隕厥身家朕歷稽往古宵人誤國代代有之觀諸近事復炯鑒昭然足爲永戒恐後之爲臣者

或仍蹈覆轍負主恩而渝素志至於身罹刑憲悔悼無由故推原情狀而論列之錄成一編以爲人臣做心之訓云

欽頒曠官論

人君執八柄以馭其臣人臣持一心以事其主此千古不易之常經也是故得百庸臣不如得一能臣得百能臣不如得一盡心之臣蓋才有短長所命於天不可強而同也至於循分效忠之心無人不可以自靖審若是斯庶官無曠庶績咸熙矣夫君之有庶官也猶天然天有四時以成歲功人君有庶官以舉百職時失序則有愆伏之患官失職豈能免廢壞之憂哉乃自古來曠厥官者往往而有怠弛之人玩愒歲月徒取膺仕厚祿以爲光寵遂耽於逸豫不復策厲以樹立勳名此便已而曠官者也庸鄙之人碌碌取充位以爲莫非王臣我何獨勞爲於是曠國事於因循而泄泄然曾無所表見於世此諉

重脩安微通志卷一  
眾而曠官者也邪曲之人遐棄正業若不相涉然乃持智計以徇私則弗遺餘力逮王事埤我惟苟焉塞責不恤其他此背公而曠官者也恣傲之人雖才足有爲而高自矜詡愜其意則殫力任之而不辭少拂抑焉卽倦懈心生而故爲不克勝任之狀此肆志而曠官者也若人者以之治事則多敗事以之圖功則鮮成功猶儼然號爲人臣不大可恥耶甚則有放蕩之人矯語清高以禮法爲拘牽視簿書爲鄙俗乃遺落一切而宅其心於世事之表以縱情自娛如晉之王澄阮咸王尼胡毋輔之等浮誕相矜廢弛職業至於頽風敗俗名教蕩然不更可歎息痛恨也哉昔魯公文伯之母猶知勉其子以考職序業而稱書說禮之徒反昧此義是何其智出婦人下也蓋秩無論崇卑事無論大小職無論輕重惟克旣厥心始爲有利於國之臣子不然糜祿素餐尸位溺職猶欲長保身名不卽罪戾其可得哉夫君

之馭臣爵之祿之予之置之生之凡以教忠獎善厲天下人臣之心耳至人臣自昧厥心因以負上之心然後必不得已而有奪之廢之誅之之事夫豈在上之初念哉於戲治亂之理在庶官敬忽之機在一心爲人臣者柰何不察

欽頒賦役全書序

朕惟古帝王臨御天下必以國計民生爲首務故禹貢則壤定賦周官體國經野法至備也當明之初取民有制休養生息至萬曆年間海內殷富家給人足及乎天啟崇禎之世因兵增餉加派繁興貪吏緣以爲奸民不堪命國祚隨之良足深鑒朕荷

上天付託之重爲生民主一夫不獲亦疚朕懷凡服御膳羞深自約損然而

祖宗百神軍旅燕饗犒錫之繁以及百官庶役餼廩之給罔不取之民

聞誠恐有司額外加派豪蠹侵漁中飽民生先困國計何資茲特命戶部右侍郎王宏祚將各直省每年額定徵收起存總數實數編撰成帙討稽往牘參酌時宜凡有參差遺漏悉行駁正錢糧則例俱照萬曆年間其天啟崇禎時加增盡行蠲免地丁則開原額若干除荒若干原額以萬曆刊書為準除荒以覆奉御旨爲憑地丁清核次開實徵又次開起存起運者部寺倉口種種分晰存留者款項細數事條明至若九釐銀舊書未載者今已增入宗祿銀昔爲存留者今爲起運漕白二糧確依舊額運丁行月必令均平胥襖盜甲昔解本色今俱改折南糧本折昔留南用今抵軍需官員經費定有新規會議裁冗改歸正項本色絹布顏料銀硃銅錫茶臘等項已收折者照督撫題價值開列解本色者照刊書價值造入每年督撫確察時值題明填入易知單內照數辦解更有昔未解而今宜增者有昔太冗

而今宜裁者俱細加清核條貫井然後有續增地畝錢糧督撫按彙題造冊報部以憑稽核綱舉目張勒成一編名曰賦役全書頒布天下庶使小民遵茲令式便於輸將官吏奉此章程罔敢苛斂爲一代之良法垂萬世之成規雖然此其大略也若夫催科之中寓以撫字廣招徠之法杜欺隱之奸則守令之責也正已率屬承流宣化覈出納之數慎挪移之防則布政司之責也舉廉懲貪興利除害課殿最於荒墾昭激揚於完欠恪遵成法以無負朕足國裕民之意則督撫之責有特重焉其敬承之毋忽



重修安徽通志卷二

皇言紀

聖祖仁皇帝詔諭

順治十八年

奉

天承運

皇帝詔曰惟我國家受

天眷命

祖功

宗德肇造丕基我

皇考大行皇帝盛德至仁英姿大度纘承曆數統一寰區恩澤洽於多

方政教臻於上理方期邦國永底雍熙不幸奄棄臣民遽升

龍馭顧茲大寶屬以藐躬朕煢煢在疚本不忍聞而諸王貝勒大臣文武官員人等僉謂神器既已攸歸天位不宜久曠堅請再三朕是以俯徇輿志勉抑哀衷於是月初九日祇告

天地

宗廟

社稷卽皇帝位仰惟

上天眷祐之篤

祖宗付託之隆涼德冲齡膺茲重寄敬圖觀光揚烈用紹無疆之休其以明年爲康熙元年與天下更始式衍舊恩聿宏新化所有合行事宜開列於後

康熙四年

恩詔直隸各省舊欠錢糧著照蠲免

恭紀食貨志蠲賑

上諭總督巡撫皆係倚任重臣若秉躬清正爲下官表率使民生得所始可稱能副倚任之意這種禮物俱以爲常例各督撫反稱某州縣上等某州縣下等按定數目公然收受州縣官員俱自民間派取餽送以致生民至於極窮若上官果能清正下官何敢私派於民若止納定額錢糧安得至於極窮觀今民生困窮皆由上官作此等種種弊端所致甚明以後各督撫如再不改此等弊端仍然踵行著科道官采訪指名糾參定行從重治罪決不饒恕其司道府廳各官亦行此項弊端不改仍取之州縣各官州縣各官有不革此陋習仍私派取於民者著督撫不時嚴察參奏若徇情不行參奏經科道糾參或旁人出首將不糾參之督撫一併從重治罪爾部院通行直省

曉諭

旨諭戶工二部

恭紀食貨志關權

重修安政通志

重刊文獻通考卷二  
旨諭戶工二部

恭紀食貨志關樞

康熙六年

上諭吏部等大小各衙門民爲邦本必使家給人足安生樂業始可以稱太平之治今聞直隸各省人民多有失所疾苦窮困深可軫念或係官吏貪酷朘削生民或係法制未便致民失業今當如何而後使得遂其生計凡一切關係民生利病應行應革事宜著內外各衙門大小文武等官各抒確見陳奏勿隱以憑采擇施行但不許以浮泛虛文及無益於民之事借端塞責具奏著吏兵二部傳諭遵行特諭

康熙八年

恩詔直隸各省丁地正項錢糧實係拖欠在民奏請蠲免

恭紀食貨志蠲賑

康熙九年

上諭禮部朕惟至治之世不專以法令爲務而以教化爲先其時人心

醇良風俗樸厚刑措不用比屋可封長治久安茂登上理蓋法令禁於一時而教化維於可久若徒恃法令而教化不先是舍本而務末也近見風俗日敝人心不古囂陵成習僭濫多端狙詐之習日工獄訟之興靡已或豪富凌轢孤寒或劣紳武斷鄉曲或惡衿出入衙署或蠹棍詐害善良萑苻之劫掠時聞讐忿之殺傷疊見陷罹法網刑所必加誅之則無知可憫宥之則憲典難寬念茲刑辟之日繁良由化道之未善朕今欲法古帝王尙德緩刑化民成俗舉凡敦孝弟以重人倫篤宗族以昭雍睦和鄉黨以息爭訟重農桑以足衣食尙節儉以惜財用隆學校以端士習黜異端以崇正學講法律以儆愚頑明禮讓以厚風俗務本業以定民志訓子弟以禁非爲息誣告以全善良誠窩逃以免株連完錢糧以省催科聯保甲以弭盜賊解讐忿以重身命等項作何訓迪勸導及作何責成內外文武該管各官督

重修家範通志 卷二  
率舉行爾部詳察典制定議具奏特諭

康熙十年

恩詔各省丁地正項錢糧實係拖欠在民奏請蠲免恭紀食貨志蠲賑

康熙十一年

旨江南水旱頻仍停徵未完錢糧恭紀食貨志蠲賑

康熙十二年

旨水淹田地但有涸者三年後起徵恭紀食貨志蠲賑

康熙十四年

上諭一自用兵以來軍需浩繁直省地方百姓供億煩苦深可憫惻各該督撫務須潔己率屬加意撫綏嚴禁有司勿得橫徵私派及借端供應兵馬需索科斂官吏分肥如有此等弊端該督撫卽行據實指參如或徇庇別經發覺並該督撫一併從重治罪

康熙十七年

旨積貯爲國家大計恭紀食貨志漕運

上諭吏部自古一代之興必有博學鴻儒振起文運闡發經史潤色詞章以備顧問著作之選朕萬幾時暇遊心文翰思得博洽之士用資典學我朝定鼎以來崇儒重道培養人材四海之廣豈無奇才碩彥學問淵通文藻瑰麗可以追蹤前喆者凡有學行兼優文詞卓越之人不論已未出仕著在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報於該督撫代爲題薦務令虛公延訪期得真才以副朕求賢右文之意爾部卽通行傳諭遵行特諭

康熙十八年

旨江南財賦繁多舊欠無徵錢糧俱著蠲免恭紀食貨志蠲賑

康熙二十年雲貴蕩平

恩詔兵革寢息人民乂安

恭紀食貨志  
蠲賑關權

康熙二十三年

恩詔江南浙江江西湖廣省分自用兵以來供應繁苦宜加恩恤

恭紀食貨

志蠲賑

康熙二十五年

上諭朕聞鳳陽徐州等處地方亢旱人民困苦

恭紀食貨  
志蠲賑

上諭朕聞鳳陽徐州等處亢旱其給賑事宜會同戶部議奏

恭紀食貨  
志蠲賑

康熙二十七年

旨十七年以前未完漕項俱著蠲免

恭紀食貨  
志蠲賑

旨安徽二十八年應徵地丁各項俱著蠲免

恭紀食貨  
志蠲賑

康熙二十八年

上諭扈從部院諸臣朕稽古省方咨求治理閱視河道期底平成凡有利於民生必令霑夫實惠茲行次浙省禹陵在望念大禹功德隆威萬世永賴應行親詣以展企慕之忱其致祭典禮所司卽察例舉行政治所先在崇文教江南浙江爲人文萃集之地入學額數應酌量加增永昭宏獎著該督撫詳議奏請江寧鎮江杭州駐防滿洲漢軍兵丁鎮守要地久歷歲時深用軫念應作何恩賚以彰優恤著該部議奏自南巡以來所經過地方官員除八法處分及列款糾劾外凡因公誣誤降級畱任者俱准與開復降級調用者著帶所降之級畱任其經過地方現在監禁人犯除十惡及詔款所不赦等罪並官員犯贓不宥外其餘自康熙二十八年二月十一日以前死罪及軍流徒罪以下已結未結俱著寬釋以示朕赦罪宥過之意備辦船隻地方各官效力勤勞著該督撫會同奉差官員確查具題各加一級

夫供役勞苦亦著該督撫察明人數量給恩賞朕廕念民依特蠲租賦總期實德潤澤蒼生近見民間有建立碑亭稱頌德意者雖出羣黎感戴之誠但恐各郡皆然未免致損民力誠使閭閻殷阜則裨益良多碑亭何與焉嗣後亦宜停止江浙錢糧既經蠲豁猶慮有不肖有司借端詞訟朘削民生著該督撫嚴行禁飭至各處權關原有則例朕舟行所至諮訪過關商民每不難於輸納額稅而以稽留關次不能速過為苦權關官員理宜遵奉屢頒諭旨恤商惠民豈可反貽商民之累自今應力除積弊凡商民抵關交納正稅即與放行毋得稽留苛勒以致苦累違者定行從重處分朕早夜孜孜惟冀官吏軍民士農商賈無一人不獲其所故於民生吏治圖維區畫務極周詳爾等即可傳諭俾一體奉行稱朕意焉特諭

旨江南積年民欠概與豁除恭紀食貨志蠲賑

聖駕南巡

上諭尚書張玉書等恭紀食貨志關權

上諭軍民七十以上者許一丁侍養免其襍派差役八十以上者給與絹一疋綿一斤米一石肉十斤九十以上者倍之謹增

康熙二十九年

上諭常平倉不必撥給兵米恭紀食貨志儲積

上諭直省督撫恭紀食貨志儲積

上諭定民之道宜裕蓋藏恭紀食貨志儲積

康熙三十年

上諭戶部朕撫馭區宇三十年以來早夜圖維惟以愛育蒼生俾咸臻安阜為念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀擗節支給數載於茲今觀

歷年儲積之粟恰足供用應將起運漕糧逐省蠲免以舒民力除河  
南省明歲漕糧已頒諭免徵外湖廣江西浙江江蘇安徽山東應輸  
漕米著自康熙三十一年始以次各蠲免一年至江寧京口杭州荆  
州大兵駐防地方亦應豫行積貯著將康熙三十一年起運三十年  
漕米各截留十萬石存貯倉廩令該地方官敬慎守視以備需用爾  
部即遵諭行特諭

康熙三十一年

旨積貯米穀最為要務恭紀食貨志儲積

上諭朕聞直省各節慶賀表箋專官齎送以致驛遞勞苦煩費嗣後停  
其專官齎送交與總督巡撫彙齊由驛遞送進地方當有裨益著議  
奏謹增

康熙三十二年

上諭內閣恭紀食貨志蠲賑

康熙三十六年

上諭提督江南學政學士張榕端提督浙江學政侍講張希良自古帝  
王治天下率以興賢育才為首務稽察前制各省學政皆用詞臣董  
率之任至重也近來士習未變文事未彰良由督學各官不能仰體  
朕意茲特命爾前往江南浙江等處提督各府州縣學政爾尚端軌  
儀崇經術勤勸課嚴坊刻振維新之典革積衰之弊毋炫華而遺實  
毋避怨以市恩俾士有真材國收實用南土人文所萃尤宜加意作  
新多方鼓舞以稱朝廷培植人材至意所屬司道府州縣提調等官  
凡關係學政者聽爾據實考核及禮部題准申飭事宜俱當著實舉  
行向有傳諭嚴禁考試情弊爾當恪奉遵依至於本處督撫各有攸  
司不得互相干預如遇公事交接暨文移往來俱照平行其布按都  
道

重刊安徽通志卷二  
三司接見禮儀往來文書有干係學政者俱照巡撫衙門例行爾受  
茲委任務嚴絕情面一秉虛公振拔孤寒澄汰汗賤教士有程取文  
有法俾士風不變時惟爾功如或蹈常襲故違命曠職亦惟爾罰爾  
其慎之故敕

康熙三十七年

上諭戶部淮安揚州鳳陽等處比年水患頻仍浸漫隄岸田多淹沒耕  
穫無從百姓艱於粒食經朕時加軫恤屢賑屢蠲被災地方賴以安  
堵但念久歉之餘恐致資生匱乏朕廑殷切未嘗稍釋於懷前此  
雖頻敷麻澤至再至三用裨羣黎生計猶恐開春東作農事艱難若  
不大沛恩施安能令小民各得其所著將海州山陽安東鹽城高郵  
泰州江都興化寶應壽州泗州亳州鳳陽臨淮懷遠五河虹縣蒙城  
盱眙靈璧等州縣並被災各衛所康熙三十八年一切地丁銀米等

項及漕糧盡行蠲免務使民間均霑實惠以副朕體恤元元生息愛  
養至意爾部卽遵諭行特諭

康熙三十八年

上諭安徽巡撫所屬奏銷未完民欠俱著免徵

恭紀食貨志蠲賑

上諭戶禮二部朕子育黎元勤求治理日孜孜以施德澤厚民生爲急  
務而江浙二省尤東南要地朕時切軫念比歲以來蠲豁田賦賑濟  
凶荒有請必行無災不卹雖漕項錢糧向未蠲免者亦曾特旨蠲免  
愛養之道備極周詳庶幾民生日益康阜用是乘輿時邁於視河事  
竣巡歷江浙咨訪民間情形見淮揚一路旣困潦災而他所過州縣  
察其耕穫之盈虛市廛之贏絀視十年前實爲不及此皆由地方  
有司奉行不善不能使實惠及民所以小民雖懷愛戴之誠而朝廷  
恩澤卒未下究朕目擊塵懷亟思拯卹截畱漕糧寬免積欠另有諭



旨惟各鹽差關差向因軍需繁費於正額外令在差官員以所私得  
贏餘交納充用今思各官孰肯自捐私囊勢必仍行苛取商瘠民困  
均坐此弊著將加增銀兩一概停罷以紓商民之累其兩淮鹽課康  
熙三十六年曾加增四十萬兩今恐商人辦課維艱有漸至匱乏者  
著減去二十萬兩此外有應行應革事宜朕還都以後仍加商摧次  
第舉行該督撫藩臬皆地方大吏亦著悉心體訪凡有可為民興利  
除害者作速勘實陳奏嚴革襍派禁止刁訟然後胥吏不能作奸良  
民得以安業儻官吏有悖旨妄行者許商民首告該督撫察出即行  
參奏朕視民如傷惟恐一夫不獲其所茲值海寓昇平兵革不事正  
當與民休息之時故特渙沛德音減徵寬稅以為閭閻畱有餘之力  
萬一嗣後別有急需或不得已而稍議加增想在小民亦能其諒朕  
懷輸將之恐後也至於江南浙江人文稱盛入學名數前已酌定增

額今著於府學大學中學小學各增五名舉行一次以示獎勵人才  
至意爾部即遵諭行特諭

上諭朕巡幸江南徧察地方疾苦恭紀食貨志 蠲賑

康熙三十九年

上諭工部歸仁隄修築事宜恭紀河渠志

康熙四十年

上諭高承爵奏報泗州盱眙水災恭紀河渠志

上諭這隄岸修築防護著照議行恭紀河渠志

康熙四十一年

上諭直隸各省州縣恭紀食貨志 儲積

上諭安徽巡撫所屬府州縣衛恭紀食貨志 蠲賑

上諭戶部朕躬理幾務年久深知稼穡之事念阜民之道期於有備去

冬北地少雪今春雨澤微降尙未霑足誠恐蝗蝻易生有傷農事所  
在官吏亟宜先時預防直隸山東山西河南陝西江北地方歷年積  
貯倉糧果否足額該督撫宜確加稽核務使廩有餘儲不致匱乏其  
一切應行預備事宜須悉心講求料理縱年歲不甚豐稔亦可賑濟  
無虞至直隸各省現今雨澤有無多寡著該督撫卽行具摺奏聞以  
紓朕宵旰勤民之意爾部卽遵諭行特諭

康熙四十二年

萬壽恩詔朕爲天下生民主宵旰勤勞厲精圖治凡國家之休戚閭閻  
之樂利晷刻之間無不注意於此天下之大兆民之眾朕誰欺欺天  
乎至今四十餘載親歷饑饉者不知其幾南北用兵者不知其幾人  
心向背者不知其幾自責涼德不能撫育履冰臨淵兢業惟守仰賴  
上天眷佑

祖宗厚德幸生創業未久之際方免墜失今海寓昇平年歲稍和生民  
俱已樂業邇來諸王大小臣工士庶因朕五旬輿情肫切屢請加上  
尊號朕堅意固辭不允所請蓋朕不以名譽稱揚爲尙惟以海內富  
庶爲心是以屢蠲賦役頻省刑罰總欲使老安少懷風俗淳厚漸幾  
於康乂隆平之治近因淮黃告成乃東南要務再授方略望有善後  
朕不辭勞瘁親往閱視見畿輔山左江浙等省耆老人民俱中心愛  
戴雖童穉亦咸歡欣瞻仰是知民心皆一用是益深軫念視切如傷  
所以星夜回鑾茲特大沛鴻恩普施遐邇庶幾民生咸登壽域和協  
徧滿寰區所有應行事例開列於後於戲安民則惠益宏逮下之恩  
御眾以寬聿溥好生之德布告天下咸使聞知

康熙四十四年

上諭工部

恭紀河渠志

重修安徽通志

卷二

十

康熙四十五年

上諭戶部朕子育黎元日求所以休養利濟之道念惟賜租減賦實有裨益於民生直隸各省錢糧次第全蠲一年者業經數舉獨是歷年逋負積累加增舊稅新徵勢難兼辦縱使少寬民力分年帶輸而督令續完仍多拮据朕睠懷及此深切軫恤是用蠲逋已責大沛恩膏俾閭閻獲免追呼官吏亦不罹參罰直隸山東積欠錢糧今年俱已蠲免其山西陝西甘肅江蘇安徽浙江江西湖北湖南福建廣東各省自康熙四十三年以前未完地丁銀二百一十二萬二千七百兩有奇糧十萬五千七百石有奇著按數通行豁免或舊欠已完在官而現年錢糧未完足者亦准扣抵諭旨到日各該撫立行所屬張示徧諭有不肖有司以完作欠朦混銷算及開除不清者該督撫卽時題參嚴加治罪爾部卽遵諭行特諭

上諭朕製古文淵鑑資治通鑑綱目等書

恭紀學  
校志

康熙四十六年

上諭戶部江浙地方賦役殷繁倍於他省朕屢經巡歷時切軫懷比年以來業已節次敷恩頻行蠲貸頃因兩省偶被災旱隨命按數減徵蠲免漕欠並分截本年漕糧令該督撫親往散賑猶念民間素鮮儲蓄生計不充非更加格外滋培則荒歉之餘未能驟臻康阜茲特再施膏澤用宏休養康熙四十七年江南浙江通省人丁共額徵銀六十九萬七千七百餘兩著悉與豁免其今年被災安徽巡撫屬七州縣三衛江寧巡撫屬二十五州縣三衛應徵地畝銀共二百九十七萬五千二百餘兩糧三十九萬二千餘石浙江二十州縣一所應徵地畝銀九十六萬一千五百餘兩糧九萬六千餘石四十七年亦俱著免徵所有舊欠帶徵銀米並暫停追取俟開徵時一併輸納務使

重刊安徽通志 卷二  
小民一歲之內絕跡公庭安處隴畝俾得優游作息經理農桑庶幾  
閭閻氣象可以日加豐豫諭旨到日該督撫體朕孳孳惠愛黎元至  
意各飭有司實心奉行仍張示通曉令咸知悉儻蠲除不實致有侵  
冒察出定治重罪爾部卽遵諭行特諭

上諭黃淮兩河關係運道

恭紀河渠志

旨旗丁領運

恭紀食貨志漕運

康熙四十七年

上諭工部朕南巡閱河時見洪澤湖風浪危險隄岸陡立商民船隻觸  
石損壞傷人甚多朕心時切軫念因特令河臣沿湖隄創設救生木  
椿自設椿以來數年內並未損船傷人於商民大有裨益此椿應時  
加增修愈多愈善嗣後著江寧蘇州杭州三處織造每歲於節省銀  
內各捐五百兩解送總河衙門以備救生椿之用該督逐歲修理存

案不必入奏銷如不實行修理於別項支用者從重治罪

上諭戶部

恭紀食貨志蠲賑

康熙四十八年

旨動常平倉米穀賑濟饑民

恭紀食貨志蠲賑

康熙四十九年

上諭江南舊欠地丁等項

恭紀食貨志蠲賑

康熙五十一年

上諭安徽五府屬未完地丁等銀准其免徵

恭紀食貨志蠲賑

上諭戶部朕宵旰孜孜勤求民瘼永爲惠下實政無如除賦蠲租除每  
歲直省報聞偶有水旱災傷照輕重分數豁免正供仍加賑卹外將  
天下地丁錢糧自五十年爲始三年之內全免一周使率土黎庶普  
被恩膏除將直隸奉天浙江福建廣東廣西四川雲南貴州及山西

河南陝西甘肅湖北湖南各直省康熙五十年五十一年地丁錢糧一概蠲免歷年舊欠錢糧一併免徵外所有江蘇安徽山東山西各撫屬除漕項外五十二年應徵地畝銀共八百八十二萬九千六百四十四兩有奇人丁銀共一百三萬五千三百二十五兩有奇俱著察明全免其歷年積欠銀二百四十八萬三千八百二十八兩有奇亦並著免徵計三年之內總免過天下地畝人丁新徵舊欠共銀三千二百六萬四千六百九十七兩有奇各該督撫務須實心奉行體朕軫念民生至意如有侵欺隱匿使惠不及民借端科派者督撫嚴行察參督撫失察事發之日亦嚴加究治諭旨到日立即徧示城郭鄉村咸使知悉爾部即遵行特諭

恩詔各省應徵房地租稅銀兩查明豁免恭紀食貨志蠲賑

上諭朕自沖齡即好讀書亦好寫字一切經史靡不徧閱成誦恭紀學校志

康熙五十一年

上諭海宇承平日久戶口日繁地畝並未加廣宜施寬大之恩共享恬熙之樂恭紀食貨志田賦

康熙五十六年

上諭戶部朕撫馭寰宇五十餘年夜寐夙興為小民勤求生遂凡率土遠近皆期共享樂利聿成家給人足之休未嘗一日不塵諸懷也數十年以來各省正賦屢經全免歷年積欠亦已蠲徵偶有雨澤愆期或發倉廩散給或截漕糧賑救不惜數萬萬金錢米穀頻沛恩施誠念窮簷之艱慮其至於顛連失所耳近者民力雖已稍紓然念分年帶徵銀兩若不格外優寬則小民一歲所獲分納二年之賦其以贏餘養贍室家斷難充足朕每懷及此軫惻良深宜更加殊恩通行豁免今將直隸安徽江蘇浙江江西湖廣西安甘肅等八處帶徵地丁

屯衛銀二百三十九萬八千三百八十兩有奇概免徵收其漕雖例不准免亦著破格施恩將安徽江蘇所屬帶徵漕項銀四十九萬五千一百九十餘兩米麥豆一十四萬六千六百一十餘石內蠲免各半爾部卽行文該督撫嚴飭所屬實心奉行徧加曉諭俾民間無催徵之累均沾實惠用稱朕撫卹羣黎至意儻有不肖有司借端朦混私行徵收者該督撫嚴察參處如該督撫失察一併從重處分爾部卽遵諭行特諭

御製

蠲江南通賦并序

江南屢年通賦二百二十餘萬逐歲帶徵聞吏民頗以爲累朕志存約己宏濟衣菲食之風事期裕民師挹彼注茲之義特頒詔令悉與蠲除

國家財賦東南重已責蠲租志念殷膏澤何妨頻見渥普天願與樂耕耘

南巡詩序

朕念切民依咨詢幽隱於二十八年春再舉南巡爰自畿甸東臨齊魯沿沂江淮達於吳越曩者甲子之歲輿衛所經瞻顧閭閻觀省謠俗憫懷澤國軫恤羣黎未嘗一日忘於朕心已嘗形諸篇詠載前集中今茲重歷郡邑見民物漸殷生業就理遠勝曩時中心慰悅又不禁吟咏及之途中停警撤蹕欲以洞悉輿情數千里閒百姓歡躍載路星攢雲集瞻依愛戴發於至誠朕自惟化理何以克洽民情益用是欲然也乃於巡歷所至沛膏澤飭官方戒民俗修典禮經武備覽河防施諸事矣又發諸言或御帳殿或撫船窗吟咏所及性情在焉古人云詩言志凡朕篇章所寓時以民生風化惓惓爲念卽聞於眺

覽之際抒寫景物指顧山河要其寄託則自有在也因哀而集之爲南巡詩一卷云

南巡詩序

朕三度南巡咸因視河親爲籌畫遂至江浙察吏安民所歷之地隨其時宜廣沛膏澤拯疾苦焉茲行兼奉

皇太后鑾輿而南旣可無闕定省之儀且欲見

先帝開基富有四海而朕守成教育率土清寧無慚付託以博

慈顏之懌悅然往返遄迅絕無滯留百司章奏三日一送行在卽與剖

決舟行多暇仍覽書史日操觚翰偶寄吟篇莫非記采風俗時存懷

保兢業之意後之人讀朕前後南巡諸詩知朕心之有在云爾

示江南浙江守土諸臣

宇宙方清寧吏治尙端廉農使樂耕鑿民使適里閭大寮經其要小

吏毋苛纖綱紀不可弛隨時酌寬嚴爲上能自愛羣屬必畏鉗訟惟善得情操守時警砭勿恃才妄作勿以媚自快務令比戶豐膏澤遠近霑朱幡與彤騶萬姓所具瞻臧否道有碑防口難可籍不見廣廈材聳榦從幽潛不見冲霄鶴飲啄本靜恬告誡示勉勵保護茲庶黔示江南大小諸吏

東南財賦地江左人文藪時巡歷此疆民事日探剖風俗貴淳龐紛奢詎能久澄清屬大吏表率羣僚首郡縣布慈和愷悌歌父母民者國之本生計在畎畝六府旣孔修三事安可後教化默轉移各須盡官守戶使敦詩書人知崇孝友庶幾遠邇氓睥睨登仁壽誥誠申予懷斯言慎不負

操舟說

器之利用而致遠者陸行莫如車水行莫如舟舟之爲用也逸於車

而險或過之若享其逸而不入於險則恃乎操舟者之有其道也當夫水石擊撞波濤怒飛迴颿如騫驟合若離此非其巧之爲乎至於浮滄溟駕虞淵歷艤艫如衽席泛浩瀚以洞沿此非其習之然乎若或凌萬頃之中流驚颶風之四集檣楫欹傾徒侶失色巧者不及施習者不及試斯時也惴惴然有胥溺之憂自非備之以至豫而恃之以至慎殆鮮克濟事焉蓋其所爲巧與習者藝也而其所爲豫且慎者道也易曰濡有衣袽終日戒詩曰緇纏維之言其豫也言其慎也朕南巡江淮閒見操舟者苟備之預而持之慎矣雖大舟罔弗如其意之所欲爲焉苟備之不豫而持之不慎舟雖小亦不能勝任而愉快也夫舟一器操舟一藝耳猶必有道持之以不至於敗况居天下之大器者哉揚子有言乘國者其如乘航乎航安則民安矣此物此志也

督撫箴

芒芒方域分理需人岳牧之選實惟重臣寄以封疆千里而遠地則星羅令猶風偃控攝文武統御官司繩違糾慢宣德布慈廉善是旌貪黷毋着小眚是矜吞舟毋漏彼昏而墨日削月朘或市徇縱以恣矯虔澤不下殫民隱罔恤政迺不和爲時蝨賊曾是源濁而流則清曾是表正而景則傾職汝之由是曰曠墜軫我元元保釐奚賴天命天討我不敢私勛哉有位敬聽箴辭

守令箴

五等封建古今異宜郡縣之制百王同規壤地磐互提封基峙大者一州小則百里有社有稷有民有人守令何職職茲拊循勸農課桑宣條設教偃風以德從星惟好毋營筐篋毋急簿書悃幅之治歲計有餘莫高匪天而卑其聽莫愚匪民而智其性民不可掩天不可欺



一之不愼而戚自貽稽古治效嘉禾瑞麥勉能其官紹休前跡

河臣箴

自古水患惟河爲大治之有方民乃無害禹疏而九平成攸賴降及漢唐決復未艾漸徙而南宋元滋溢今河昔河議不可一昔止河防今兼漕法旣弭其患復資其力矧此一方耕鑿失職澤國波臣恫瘝已極肩茲鉅任曷容怠佚毋俾金隄潰於蟻穴毋使田廬淪爲蛟窟毋徒糜國帑而勢難終日毋虛勞畚築而功鮮覈實務圖先事盡利導策莫悔後時飾補苴術勿卽私而背公勿辭勞而就逸惟潔清以自持兼集思而廣益則患無不除績可光冊示我河臣敬哉以勛

漕臣箴

國家定鼎會極幽冀歲漕東西積待惟備軸轡銜尾數百萬計轉輸有程貴以時至專設重臣式董厥事我徒我旅亦云孔勤尙其寬恤

厚彼糗糧尙其撫綏摩彼痾痒毋借空名耗閭左藏毋踵陋習損經制常爾克持廉則吏罔弗臧吏克守法則軍罔弗康軍旣樂康競輓以將孰困而逋孰盜其糧官苟剝之用飽已囊下復效之鼠雀曷防濡滯河干如稻集蝗總計而論蝕我太倉國儲民食毋乃兩傷爾膺斯任莫忝王章

提鎮箴

武臣之職建威銷萌星羅碁布以壯干城韜鈴宜裕紀律宜明拊循宜至訓練宜精計安黎庶爰設五兵易言畜眾詩詠求寧閭閻參伍勿擾吾氓山無伏莽海絕長鯨民恬耕鑿惟爾之能饋餉時給毋致呼庚爾能廉潔眾以飽騰投醪飲河古史所稱惠逮卒伍忠愛乃生如捍頭目如衛父兄羣心從違視爾攸行文武輯睦毋相抗衡軍民調濟務持其平朕親簡閱黜陟有程下逮偏裨選授匪輕才勇必錄

竊情必懲矧爾大帥節鉞是膺宜體朕意勉竭股肱

至聖先師孔子贊並序恭紀學  
校志

顏子贊恭紀學  
校志

曾子贊恭紀學  
校志

子思子贊恭紀學  
校志

孟子贊恭紀學  
校志

訓飭士子文恭紀學  
校志

平定朔漠告成太學碑

惟天盡所覆海內外日月所出入之區悉以界予一人自踐阼迄今  
蚤夜殫思休養生息冀臻熙皞以克副維皇大德好生之意庶幾疆  
域無事得以偃兵息民迺魯特葛爾丹阻險北陲因此一方人既  
荼毒塞外輒狡焉肆其凶逆犯我邊鄙虐我臣服人用弗寧夫蕩寇

所以息民攘外所以安內邊寇不除則吾民不安此神人所共憤天  
討所必加豈憚一人之勞弗貽天下之逸於是斷自朕心躬臨朔漠  
欲使悔而革心故每許以不殺彼怙終不悛我師三出絕塞朕皆親  
御以行深入不毛屢涉寒暑勞苦艱難與偏裨士卒共之迨彼狂授  
首脅從歸誠荒外君長來享闕下西北萬里灌燧銷烽中外乂謐惟  
朕不得已用兵以安民既告厥成事迺蠲釋青災潔事禮望為億兆  
祈昇平之福而廷臣請紀功太學垂示來茲朕勞心於邦本嘗欲以  
文德化成天下顧茲武略廷臣僉謂所以建威消萌宜昭斯績於有  
永也朕不獲辭攷之禮王制有曰天子將出征受成於學出征執有  
罪反釋奠於學以訊馘告而泮宮之詩亦曰矯矯虎臣在泮獻馘又  
禮王師大獻則奏愷樂大司樂掌其事則是古者文事武事為一折  
衝之用具在樽俎之間故受成獻馘一歸於學此文武之盛制也朕

重何安衛通志卷二  
嚮意於三代故斯舉也出則告於神祇歸而遣祀闕里茲允廷臣之請猶禮先師以告克之遺意而於六經之指爲相符合也爰取思樂泮水之義爲詩以銘之以見取亂侮亡之師在朕有不得已而用之實或者不戾於古帝王伐罪安民之意云爾銘曰

巍巍先聖萬世之師敬信愛人治平所基煌煌聖言文武道一禮樂征伐自天子出朕臨域中逾茲三紀嘗見羹牆寤寐永矢下念民瘼上承帝謂四海無外盡隸候尉維彼凶醜瀆亂典常旣梗聲教遂窺我疆譬之於農患在螟螣秉畀不施將害稼穡度彼游魂險遠是怙震以德威可往而取朕志先定龜筮其依屬車萬乘建以龍旂祝融驂鸞風伯戒途宜暘而暘利我樵蘇大野水涸川瀆效靈泉忽自涌其甘如醴設爲犄角一出其西一出其東中自將之絕域無人獸羣受掩五日窮追彼狂走險大殲於路波血其孥翦其黨孽俘彼卒徒

眾鳥晝號單馬宵遁恐久駐師重爲民困慎固戍守還轅於京自夏徂冬雨雪其零載馳載驅我行再至蠢茲窮寇昏惑不悔我邊我氓以休以助爰寧其居爰復其賦藩落老稚斯恬斯嬉歲晏來歸春與之期春風飄揚我旆旖我今於邁如涉我郊言秣我馬狼居胥山登高以眺閔彼彈丸天降凶罰孤雛就羈三駕三捷封狼輿尸旣腊臯獍旣獮豺獮大漠西北解甲棄戈振旅凱入澤霈郊卜明禋肆赦用迓景福昔我往矣在泮飲酒陳師鞠旅誓屈羣醜今我來思在泮獻功有赫頌聲文軌來同采芹采藻頌興東魯車攻馬同亦鐫石鼓師在安民非出得已古人有作昭示此旨緬維虞廷誕敷文德聖如先師戰慎必克維兵宜戢惟德乃綏億萬斯年視此銘詞

增謹



重刊安海通志卷三  
長不謂謝棄臣民遽升

龍馭親授神器屬於藐躬朕

皇考大行皇帝

德妃之子昔皇二子弱齡建立深爲

聖慈鍾愛寢處時依恩勤倍篤不幸中年神志昏憤病類風狂

皇考念

宗社重任付託爲艱不得已再行廢斥待至十有餘年沈疾如故痊可無期是以

皇考升遐之日

詔朕繼承大統朕之昆弟子姪甚多惟思一體相關敦睦罔替共享昇平之福永圖磐石之安孔子曰三年無改於父之道我

皇考臨御以來良法美政萬世昭垂朕當永遵成憲不敢少有更張何

止三年無改至於

皇考知人善任至明至當內外諸大臣朕方亟資翊贊以期終始保全務宜竭盡公忠恪守廉節俾朕得以加恩故舊克成孝思儻或不守官箴自干國紀既負

皇考簡拔委任之恩又負朕篤愛大臣之誼部院屬吏直省有司亦宜實心任事潔已奉公不得推諉上官自曠厥職天下百姓受

皇考恩澤日久蠲賑頻施勸懲備至閒有愚氓甘犯律令

皇考每遇讞決必加詳審爰書累牘披閱靡遺少有可生之路立施法外之仁凡我百姓各宜孝親敬長畏法懷刑以副朕仰法

皇考如天好生之意茲因諸王貝勒大臣文武官員人等僉謂天位不可久虛

宗社允宜早主再三陳請朕勉徇輿情暫抑悲痛於是月二十日祇告

天地

宗廟

社稷卽皇帝位以明年爲雍正元年仰惟

先志之宜承深望

皇圖之永固遙昭新化期衍舊恩於戲追慕

前徽繼述無忘於夙夜廣推

聖澤恩膏願被於寰區凡爾親賢文武其共矢蓋誠各輸心膂用紹無疆之業永垂有道之庥布告天下咸使聞知

雍正元年

上諭自古帝王疆理天下必有岳牧之臣以分猷佐治而後四方寧謐共臻上理此封疆大臣以總督爲最重也總督地控兩省權兼文武必使將吏協和軍民綏輯乃爲稱職但統轄遼遠職務殷繁較巡撫

之所屬更大是在遴選屬僚之賢能者委任得宜則振綱飭紀可無廢弛之虞而以人報國亦得大臣之體特是澄清吏治必本大公之心虛懷察訪果係清節素著才具練達者任以要劇卽行保薦則舉一可以風百今或以逢迎意旨爲能以沽名市譽爲賢甚至暗通賄賂私受請託不肖官吏濫列薦章而樸素無華敦尚實治者反抑而不伸是豈風厲屬員之道乎朕視天下如一家視臣鄰如一體爾等亦宜深體此意以一家之心視兩省以一體之心視屬吏本之至公用之至當則上司之任使下僚如身之使臂臂之使指凡有才有守之人皆樂爲效用矣至於所在管轄地方有作奸犯科之豪猾倚勢剝民之搢紳理應重加懲治因巧於結納反得僥倖自全而家居之大臣官員皆經

皇考任用之人致政投閒安靜自好爲大吏者並不加以禮貌或反被

重刊安徽通志 卷三  
三  
土豪侵欺者有之亦非所以表率屬僚彰善癉惡之道也總督與巡撫將軍提督誼屬同寅凡地方軍民事務宜互相商推各本虛公勿苟且雷同勿偏執臆見方於國計民生有所裨益總督參劾知府例由司道揭報參劾州縣例由兩司道府揭報眾論僉同所以示公也今有參劾之後始行補揭夫果其當劾司道府不能揭報於前既有徇庇之愆而令其補揭於後又欲寬其失察之罪彼此巧飾以欺朝廷尙得謂之至公平朕觀古之純臣載在史冊者興利除弊以實心行實政實至而名亦歸之故曰名者實之華也今之居官者鈞譽以爲名肥家以爲實而云名實兼收不知所謂名實者果何爲也爾督臣膺茲簡畀固宜篤矢忠誠尤當戒諭屬員痛改陋習更有仕宦之初頗著廉名及身躋大位則頓易其操者古人謂之巧宦其心事豈可問乎且職居制閫亦非徒以清操自善也若但謹身節用而遇地

方大事一籌莫展雖免貪冒之名究鮮屏翰之實國家又何所倚毗耶督臣皆

皇考擢任之大臣朕嗣紹丕基一切遵循成法惟冀爾等察吏安民練兵核餉崇實行而不事虛名秉公衷而不持偏見故諄諄告誡並兩司道府州縣各有諭旨爾等亦宜細心體察與爾屬吏其勵官箴交相儆惕朕自優加恩禮始終保全若爾等恣意徇私不能竭忠盡職則深負

皇考簡用之恩其罪甚大國法森嚴雖欲寬貸爾等不可得矣特諭  
上諭國家任官守土綏輯兆民封疆之責惟撫臣爲重今之巡撫卽古者保釐夾輔之臣也一省之事凡察吏安民轉漕裕餉皆統攝於巡撫苟非正己率屬振飭厲精則一切政刑錢穀必致隳墮拊循保障之功何賴乎夫吏治不清民何由安從來大法則小廉自兩司以至

重刊安海通志 卷三  
郡縣平時參見接談即可略知其才品優劣迨試以委任訪之輿情賢否清濁自難淆混惟上官偏私好諛屬僚善於逢迎者即推爲才能其樸直自好潔己愛民之員反無見知之地及至計典黜陟並遇選擇保題之缺或先納賄賂或責報異時始爲之薦引亦有寄耳目於監司等官聽毀譽於幕賓僚友之口以致舉劾不公潛滋奔競勸賞黜陟既失其當地方安得良有司乎藩庫錢糧虧空近來或多至數十萬蓋因巡撫之費用皆取給於藩司或以柔和交好互相侵挪或先鉤致藩司短長繼以威制勒索分肥入己徒供一身夤緣自奉之費罔顧朝廷帑藏財用之虛及事發難掩惟思加派補庫展轉累民負國營私莫此爲甚州縣積穀本爲備荒之計水旱歉收之歲待此拯濟於民生最有關係今皆視爲正供之餘項借出陳易新之名半爲胥吏中飽半爲州縣補空一遇災荒茫無賑貸皆由巡撫平時

疏略包容玩愒所致也屬員缺出委署雖由兩司詳請其實巡撫操其權下屬鑽營囑託以缺之美惡定酬賂之重輕攝篆之人久則年餘近亦數月往往視爲傳舍情同行劫不恤小民之脂膏但飽谿壑於無厭務償得署之餽遺而止試思此一年數月之間窮黎何罪而可縱貪暴以剝削之乎此等積弊尤爲國法所不容者巡撫參劾知府應由司道揭報參劾州縣應由司道府揭報所以示公慎無私之義也近有先行參劾而令其補揭若所劾不公則其補揭未免以勢凌之使不得不從果其當劾則司道府既不能公揭於前而復巧飾於後以寬其徇庇失察之咎上下容隱視公令爲具文公慎無私之謂何撫標兵丁多者二千餘名少亦千餘名境內設有匪類竊發藉以捍禦搜捕今撫臣自謂無行軍進剿之職置標兵強弱於度外不加訓練器械朽鈍營伍廢弛裁汰老弱之兵空糧悉歸私橐大非國



家設兵衛民之意矣雲貴川廣獠獍雜處其奉公輸賦之士司皆當與內地人民一體休養俾得遂生樂業乃不虛朕懷保柔遠之心嗣後毋得生事擾累致令峒氓失所至於土豪巨猾結交官吏武斷鄉曲逞奸干紀之徒每或彌縫漏網而告休歸田之大臣官員安分杜門反徇私吹索借端凌踐此皆大失好惡之公尤損保全耆舊之義非鎮撫者所當畱意乎爾諸撫臣皆荷

皇考任用之恩受全省撫綏之寄朕纘承大統祇遵成憲優禮大臣保全終始惟冀爾等各抒忠悃安靖封疆所諭者有則悔悟速改無則省躬加勉兩司道府州縣各有諭旨爾亦宜詳細體察與諸屬吏共相勉助同心協力以盡職守若不念

皇考簡畀之隆致貽地方黎庶之害負恩曠職自取罪戾朕又安能廢法以宥爾乎特諭增

上諭朕惟自古帝王皆以興賢育才為務我國朝自

太祖

太宗

世祖定鼎中夏首隆學校加意人才開國規模超越前古迨至我

皇考聖祖仁皇帝御極六十一年培養教育怙冒涵濡深仁厚澤有加無已

御製訓飭士子文頒布學宮東西南朔海澨山陬戶習詩書家敦禮樂遐邇無不嚮風文教之隆莫過於此矣朕纘承大統遵守舊章寤寐求賢惟恐或失念學校為士子進身之階督學一官尤人倫風化所繫遴選各省學臣倍加鄭重爾等須廉潔持身精勤集事實行文風兩者所當並重若徒事文華而不敦崇實行猶未為盡職也表揚忠孝節義崇祀先聖先賢訪求山林隱逸搜羅名蹟藏書而衡文一道

專以理明學正典雅醇潔爲主古人云言乃心聲氣由夙養必士品端而後文風正他日爲國家柱石爲朝廟羽儀不綦重歟勿私納苞苴勿瞻徇情面勿輕視武途勿濫取祠蔭勿矯激沽名勿昏庸廢事勿卑汙貶節勿驕暴凌人胥吏必謹關防幕客尤宜選擇如此則內外交甚本末兼修上不負朝廷下不愧多士朕耳目所及必有見聞若罔顧聲名廉隅不飭國有常憲罰必隨之勉旃毋忽特諭謹

上諭國家幅員廣大凡巖疆重鎮關塞要害之地設立總兵俾之鎮守上承督臣之節制下樹將弁之表率輯兵安民厥任綦重居是官者當以寧謐地方爲念嚴飭官兵巡輯奸宄儻有匪類務必窮盡根株使宵小無從潛匿良民得以寧居若平時漫無覺察日久必致蔓延綢繆未雨之謂何武臣雖不干民事然保障捍衛責有攸歸守此方卽當軫念此方之民毋得視之膜外縱兵肆擾至文武職任雖分盡

心王事則一彼此和衷同心共濟自不致貽誤公事況揆文振武經術同源善於恤兵必善於愛民尙何至縱兵虐民失國家設兵衛民之意乎總兵統轄營汛甚多當以訓練爲先嫻騎射整隊伍備器械限期校閱勤惰嚴分賞罰明而軍政肅隱然一長城矣所屬將弁兵丁智勇超羣則立登薦剡武藝精熟則特拔戎行以之鼓勵軍士猶有古良將風焉兵之所需糧餉最重給糧而加剋則師旅有枵腹之憂缺兵而不補則營伍有空虛之患總兵率先潔己嚴飭偏裨毋得久懸兵缺以恣侵漁毋得剋減額糧以肥囊橐則兵籍無虛士氣益奮有不收臂指之效者乎至於馭兵之道務在寬嚴得中過寬則兵以怠玩而生驕過嚴則兵以拘迫而滋怨能於嚴明之中隱寓愛恤之意庶幾上下一心忠義自奮此又在爾鎮臣之善爲運用者也仰惟

皇考垂誠提鎮諸臣有曰韜鈴宜裕紀律宜明拊循宜至訓練宜精又曰文武輯睦毋相抗衡軍民調劑各得其平煌煌天語勒於箴規久矣爾等皆係

皇考簡畀之人果能實心力行不致始勤終怠上負

聖訓朕心嘉乃成績必懋錫殊典如其徒擁厚祿虛糜爾位既無益於兵民致有乖於令典國法森嚴朕不爾貸也特諭增謹

上諭朕惟國家官制分省開藩爾職居方伯任寄旬宣所以綏輯羣黎布昭德意實庶邦之喉舌列服之綱維任既重矣責亦大矣府州縣官之賢不肖最關民生休戚當不時察核治行務知其實分別臧否以告督撫爾以無私自信督撫自不以私心致疑協和盡力以勸賢懲不肖則除害興利一方安矣今計典之黜陟特疏之薦彈朝廷憑督撫之奏章督撫憑布按之詳揭爾布政爲官吏表式自當益矢公

忠若愛憎任情是非倒置以諂事上官通行請託爲賢以不善逢迎恥投暮夜爲不肖其何以稱之屏之翰百辟爲憲者哉夫官至監司數歷有年當服官之初廉潔自守漸登高位頓改初心更有矯飾虛聲潛納賄賂陋俗相沿謂之名實兼收其罔上行私爲尤甚孔子謂事君勿欺寧不聞乎賦役會計皆爾專司調劑均平乃爲稱職今錢糧火耗日漸加增重者每兩加至四五錢民脂民膏剝何堪至州縣差徭巧立名色恣其苛派竭小民衣食之資供官司奴隸之用爾試思戶版稅籍誰爲職掌私派橫征誰任其咎顧可失於覺察乎各省庫項虧空動盈千萬是侵是挪總無完補耗蠹公帑視爲泛常尤爲不合法宜嚴革前弊永杜侵挪如司庫盤查之責在巡撫虧空之由亦由巡撫巡撫借支而布政不應者少矣然職在監守果能廉正自持則巡撫挾勢借支斷不能行爾但謹身節用量入爲出司庫必無

虧空矣州縣庫盤查之責在知府覺察虛實之責獨在布政爾但潔已率屬不容徇庇州縣庫必不虧空矣朕深悉弊原所以反覆諄切言之冀爾等悔且改也

皇考德洽區宇六十餘年朕嗣守丕基惟成法是式爾等皆蒙

皇考簡拔職任藩宣果能各效忠誠凜遵功令朕自始終保全加以擢用若營私黷貨曠職累民爾既負

皇考之深恩朕又安能弛國家之令典三尺莫追爾其慎之特諭謹

上諭朕惟直省大小獄訟民命所關國家各設按察司以專掌之一切州縣中詳至爾司而獄成凡督撫達部題奏事件皆由爾司定案任豈不重歟

皇考仁覆如天每覽西曹奏牘反覆推詳惟寬惟慎逮情真罪當猶施緩決之恩好生之德洽於民心六十餘年於茲朕嗣守

大訓思四海之內有匹夫匹婦罰非其辜者卽非所以繼

皇考之志夙夜凜凜焉何道而能不濫不冤實爾司是賴朕惟國家考定律例所以弼教非以厲民是故嚴立刑書防其或麗於法及至斷獄又條分縷析思以曲全其生書曰欽哉欽哉惟刑之恤哉又曰與其殺不辜寧失不經此律例之本意也今或情例相違牽合文法以納民於網或有兩例並見輒上下其手以自遂其私安得無冤獄哉太祖高皇帝之訓曰生殺之際不可不慎聽斷之官必期得情大哉聖

言包舉虞書周禮之義夫折獄憑口供而平反憑案卷今法吏不求得情惟求完結州縣案卷之申詳爾司者多鍛鍊口供附於律例冀免爾司之駁查爾司之詳督撫督撫之揭部院者又加文致焉冀免三法司之駁查漢路溫舒所云奏當既成雖臬陶視之猶以為死有餘辜者也口供案卷如是冤抑何從平反咎在聽斷之初心原非欲

必得其情也今宜釐剔宿弊歸於明允毋得因循故事自墮姦欺也  
大計黜陟由爾司詳報督撫宜以用刑明慎執法不阿者爲賢能毋  
以善事督撫弗逆爾意者爲賢能也地方豪猾若苗有莠不除不翦  
害我嘉生至於良善巨室致政大臣猾吏或借端侵抑之非所以稱  
朕意也邇來士大夫好云名實兼收所謂名者官爵也所謂實者貨  
財也習俗媮薄朕甚憫焉夫六廉之義百司攸同至納賄出入人罪  
於法尤重戕人之命破人之家以潤屋奉身歷觀古來逃於國法者  
十無一二免於天罰者更百無一二書之呂刑曰獄貨非寶非聽訟  
者之明訓歟爾司其正已率下使法無枉撓庶幾刑措之風尙其勸  
諸特諭增

上諭爾等官歷僉司所以贊襄藩臬承流宣化者也分守分巡職居協  
理糧河鹽驛各有專司身居是官必顧名思義名者實之華也克副

其實而後名歸焉如守巡兩道首當潔己惠民凡府州縣之廉潔貪  
汙俱宜細加察訪不時密詳督撫以憑舉劾地方有土豪武斷尤宜  
禁戢翦除衛良鋤莠乃稱其實若但知趨承大吏或祇圖下屬陋規  
一切吏治民生槩置不問貪庸陋劣殊負朝廷設官之意矣糧道專  
理漕運職任匪輕使徒知起運規例扣剋運費苦累運丁營私煩擾  
有玷官箴貽害百姓何所底止河道有董率工程之責凡分修河員  
孰賢孰否俱應洞晰並宜親身經歷查勘估計某口險峻某口平易  
某處隄工堅固某處冒支帑金儻不計虛實不辨勤惰僅以納賄多  
者爲能員餽遺少者爲拙吏而於工程漠不經意一遇坍塌誰之咎  
耶鹽道一官尤關國課邇年鹽法弊竇叢生正項銀糧每多虧欠一  
由上下各官需索商人巧立名色誅求無已窮商力竭不得不挪新  
補舊上虧國課高擡鹽價下累小民至於官鹽騰貴貧民販賣私鹽

捕役鬪毆株連人命流弊無窮一由商人用度奢靡相仍陋俗不知節儉致欠額徵爾等運籌鹽法宜將陋例積習盡情禁革必思何以甦商何以裕課上供軍國下利閭閻方為稱職驛道為驛站錢糧所係必廉潔自守乃克剔弊釐奸凡驛遞馬匹數目多寡每有假冒開銷歲修船隻亦有虛浮不實該員一貪貨貨勢必昏庸或過於苛覈勒索多方經管屬吏疲不能支總之病官病民悉緣貪黷敬爾在官垂諸古訓靖共爾位載在風詩爾等各有常職各守官方名實二字極宜體認今以獻賂為實虛譽為名動云名實兼收內以欺己外以負國有靦面目其何以立身而抒忠盡乎

皇考御極六十餘年以軫恤民生為首務各省道員必親加遴擢諄諄誠勉極其詳慎朕繼承大統翼翼小心惟仰體

皇考愛養元元至意亦期爾等爭自濯磨振飭風憲以副朕望果能肅

清綱紀無致廢弛朕當破格獎勵其或因循不改朕必置之重法特

諭

上諭朕惟國家兵制凡疆宇要地既設提督總兵統率鎮守又設副將參遊分列營伍遞相鈐轄蓋從古法兵有大帥必有偏裨所以宣揚威武協贊軍機收指臂之效奠磐石之安也爾等所屬地形有險易兵數有多寡各宜預定練兵之法親校騎射嚴試技勇簡拔驍銳更換老羸務令一營士卒人材雄健武藝精嫻又時教以行陣使之步伐進退井然有法日演月習氣壯心齊自成有制之師而無難折衝禦侮矣乃有不肖將弁不勤訓練按籍徒有虛名責效毫無實濟營伍廢弛為害最大其弊由於將弁之貪利而廢法一在冒虛糧而兵無實數一在剋月糧而兵有怨心上虧天家之糧餉下賸窮卒之脂膏身司戎務而不能廉正以服眾雖日示訓練之法誰為之踴躍用

命乎爾等遇有兵丁空缺卽選力勇技精者補足隊伍至於馬步各糧按期頒給不得剋減分毫古之良將多以愛恤士卒克建膚功投醪挾纊之風爾等宜知嚮慕焉官軍之協守一方所以捍衛一方之百姓故曰設兵以衛民也防亂於未萌緝奸於已發俾居民安家樂業共享昇平自然受兵之利而不受兵之害儻或約束不嚴縱兵肆虐誘賭放債恃強奪利甚至地方小警漫不防禦緝捕以致奸宄滋蔓徒卸責於有司文武失和秦越相視殊背國家設兵鎮守之意律法具在罪有攸歸至於爾等簡用督撫中軍責任匪輕尤宜潔己奉公恪遵法紀至都司守備千總把總等員各有城守汛防之責亦宜努力稱職自奮功名朕念爾等曾受

皇考選擢之恩自應保守前勞力圖後效果能整飭戎伍允著干城之望朕自不惜寵以崇階儻若廢墮武備侵漁糗芻甚且妄執武官不

惜死之言恣意逞威虐民生事爲害於地方王法森嚴決難輕貸特

諭

上諭國家親民之官莫先於守令蓋州縣官與民最親而知府又與州縣官最親凡州縣興利除弊之事皆於知府有專責焉是知府一官分寄督撫監司之耳目而爲州牧縣令之表率承流於上宣化於下所繫綦重矣漢宣帝有曰太守吏民之本也又曰庶民所以安其田里而無歎息愁恨之心者政平訟理也與我共此者其惟良二千石乎故兩漢循良稱盛而龔黃召杜諸人大都皆廉潔和平正身率屬以與民休養生息史稱其所居民富所去民思此皆彰明較著者也皇考澄肅官方慎簡僚吏知府中有政績茂異聲名著聞者必加優眷數年之間卽膺殊擢所以鼓勵循良務令羣黎受福爾等蒙

皇考簡用之恩受國家民社之寄地方不甚遼遠則於民間之疾苦可

以周知勢分不甚懸殊則於屬下之賢否可以洞悉爾果廉正自持  
屏絕賄賂則督撫監司必不致肆行需索而州牧縣令亦不敢恣意  
貪婪近聞州縣火耗任意加增罔知顧忌以小民之脂膏飽貪吏之  
谿壑由爾不能卻遺金於暮夜又安能禁屬吏之濫征乎盤查倉庫  
必須覈實不可視爲故事乃或借盤查之名勒索餽遺是因盤查而  
虧空愈甚矣爾能時勤勸誡加以體恤則州縣可無虧空之虞能制  
節謹度淡薄是安則爾亦可免虧空之累勸農課桑以厚風俗禁強  
戢暴以安善良平情聽斷以清獄訟皆爾職守之所當盡者至於督  
撫舉劾州縣必由爾之詳揭務須秉公持正勿涉偏私若善於逢迎  
者從而庇護薦拔之而端方恬靜之人反故爲摧抑下吏皆苟且營  
私以求容悅地方之事尙可問乎居官者每有初入仕途清操自矢  
漸登華要頓改初心既知砥礪廉隅卽當始終一節更有巧於仕宦

者人每謂其名實兼收朕最不解此語夫名者實之華果能潔已愛  
民奉公盡職此所謂實也治行稱首民歌輿頌此所謂名也實至而  
名隨之如本立而華茂焉若以弋取虛譽爲名而以封殖多藏爲實  
則小人之尤更甚於貪黷彰聞之輩矣朕纘承大統夙夜祇懼惟恐  
有負

皇考付託之重深冀爾等各體此意精白乃心以古循良自勉若徇私  
納賄不能率屬愛民貽害地方蔑視憲典三尺具在朕不能爲爾等  
寬也特諭增

上諭朕惟國家首重吏治爾州牧縣令乃親民之官吏治之始基也貢  
賦獄訟爾實司之品秩雖卑職任綦重州縣官賢則民先受其利州  
縣官不肖則民先受其害膺茲任者當體朝廷惠養元元之意以愛  
民爲先務周察部屋綏輯鄉里治行果有其實循卓自有其名非內



聚賄而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民惟邦本本固邦寧夫所以固邦本者在吏治而吏治之本在州縣苟州縣之品行不端猶基不立則室不固庸有濟乎

皇考臨御六十一年灼知州縣之重特行引見咨詢明試至詳至慎其有廉能之員每不次超擢以示鼓勵今海內羣黎皆

皇考所懷保也朕膺

宗社重寄思繼

皇考之治功惟爾州縣諸臣具有父母斯民之責其爲朕立之基址以固邦本焉誠能潔已奉公實心盡職一州一縣之中興仁興讓教孝教忠物阜民安刑清訟簡朕將升之朝守用作股肱如或罔念民瘼恣意貪婪或朘削肥家或濫刑逞虐或借刻以爲清或恃才而多事

或諂媚上司以貪位或任縱胥吏以擾民或徇私逞欲以上虧國帑王章具在豈爾貸歟更有任州縣時私肥已橐而漫云且俟顯要方立名節者其與初市清名晚而改操之人何以異哉至於錢糧關係尤重絲毫顆粒皆百姓之脂膏增一分則民受一分之累減一分則民霑一分之澤前有請暫加火耗抵補虧空帑項者

皇考示諭在廷不允其請爾諸臣共聞之矣今州縣火耗任意加增視爲成例民何以堪乎嗣後斷宜禁止或被上司察核或被科道糾參必從重治罪決不寬貸夫欲清虧空之源莫如節儉正直節儉則用無不足正直則上官不可干以私若朘小民之生以飽上官之貪欲冒不測之罪以快一時之奢侈豈砥礪廉隅爲民父母之道乎爾州縣等官其恪共乃職勿貽罪戾毋謂地遠官卑朕不及察其賢否也

特諭

重修安徽通志

卷三

七

上諭戶部恩賜老人原爲崇年尙齒而地方賞老人者每州縣動數千金司府牧令上下通同侵扣吏役復任意需索老人十不得一上負曠典罪不容追今飭令督撫嚴查務令有司親自沿鄉訪察照看據實造册給發不許絲毫侵扣如仍蹈前弊立即參處如督撫奉行不謹朕若訪出必加失察之罪再老人九十以上者州縣不時存問其或孤寡及子孫貧不能奉膳者督撫以至州縣共同設法恤養或奏聞動用錢糧務令得霑實惠特諭增

上諭禮部致治之要首在風化移風易俗莫先於鼓舞良善使人人知彝倫天則之爲重忠孝廉節之宜敦古帝王勞來匡直所以納民於軌物者舍是無由也朝廷每遇覃恩詔款內必有旌表孝義貞節之條實係鉅典邇來直省大吏往往視爲具文並未廣諮遠訪祇將有力之家屬託賂遺者漫憑郡縣監司之申詳卽爲題請建坊而山村

僻壤窮氓耕織之人或菽水養親天性篤孝或柏舟矢志之死靡他鄉鄰嗟歎爲可欽而姓氏不傳於城邑幽光湮鬱潛德消沈者何可勝數爾部卽著傳諭督撫學政諸臣嗣後務期各屬搜羅虛公核詢確據本人鄉評實蹟題奏旌獎勿以匹夫匹婦而輕爲沮抑勿以富家巨族而濫爲表揚以副朕成俗化民實心彰善至意特諭增

上諭內閣禮部

恭紀學

上諭五倫爲百行之本

恭紀學

上諭直省督撫國家敦厲風俗首重賢良舉髦士以勸秀民實爲政教之大端凡封疆大吏宜共體此意廣詢博訪不可視爲具文漫不加察也前所頒恩詔內有每府州縣衛各舉孝廉方正暫賜以六品頂帶榮身以備詔用一條距今數月未有疏聞豈通都大邑之中海濫山陬之遠遂無潛修砥操克稱俊乂可應詔旨者歟誠恐有司怠於

采訪雖有端方之品無由上達殊負朕殷殷延攬之至意特著直省各督撫速遵前詔確訪所屬果有行誼篤實素為鄉黨所推者即列名舉奏毋得隱蔽及濫引塞責特諭增

上諭孝經一書與五經並重蓋孝為百行之首我

聖祖仁皇帝欽定孝經衍義以闡發至德要道誠化民成俗之本也鄉會科二場向以孝經為論題後改用太極圖說通書西銘止蒙夫宋儒之書雖足羽翼經傳豈若聖言之廣大悉備今自雍正元年會試二場論題宜仍用孝經庶士子咸知誦習而民間亦敦本勵行即移孝作忠之道胥由乎此又聞各省鄉試房考凡州縣官由科甲出身者止許入闈一次夫考官以秉公精鑒識拔文才為主何論曾否入闈嗣後凡遇鄉科各省督撫臨場調齊科甲出身之員不論已未分房監臨試以時藝一篇其文理優長者入內簾房考荒疏者俱外場

執事則分校得人而佳文盡拔矣朕於雍正元年開科廣額總欲鼓勵人才興起教化著該部通行直省督撫俾副朕崇教育才之意特

諭增

上諭朕臨御以來宵旰憂勤凡有益於民生者無不廣為籌度因念國家承平日久生齒殷繁土地所出僅可贍給偶遇荒歉民食維艱將來戶口日滋何以爲業惟開墾一事於百姓最有裨益但向來開墾之弊自州縣以至督撫俱需索陋規致墾荒之費浮於買價百姓畏縮不前往往膏腴荒棄豈不可惜嗣後各省凡有可墾之處聽民相度地宜自墾自報地方官不得勒索胥吏亦不得阻撓至升科之例水田仍以六年起科旱田以十年起科著著爲定例其府州縣官能勸諭百姓開墾地畝多者准令議敘督撫大吏能督率各屬開墾地畝多者亦准議敘務使野無曠土家給人足以副朕富民阜俗之意

重刊通志卷三  
該部即遵諭行

增

上諭各省關差

恭紀食貨志關權

上諭恩詔內開一旌表節義乃彰善大典每見直省地方有力之家尙能上達而鄉村貧窶之人則多湮沒無聞深可憫惻著督撫學臣及有司徧加採訪務使寒苦守節之家同霑恩澤至節婦年逾四十而身故計其守節已歷十五載以上者亦應酌量旌獎著該部議奏一旌表節義給銀建坊民間往往視爲具文未曾建立恐日久仍至湮沒不能使民間有所觀感著於地方公所設立祠宇將前後忠孝節義之人俱標姓氏於其中已故者則設牌面於祠中祭祀用以闡幽光而垂永久著該部議奏

增

上諭蠲免合肥舒城等州縣衛地丁

恭紀食貨志蠲賑

上諭漕船關係緊要

恭紀食貨志漕運

上諭戶部朕自御極以來宵衣旰食無日不以民依爲念督撫以下守令以上凡有地方之責者均宜公忠體國仰副朕心今年夏月朕以北省二麥歉收差員到南省於秋成後採買米石以備賑貸平糶朕意切於爲民正欲酌盈劑虛以羨補不足也又恐有不便於民之處於差員臨行之時再三申諭地方米多方可採買不必定要買足今聞各省地方官因欽差買米禁止販商不許出境大負朕痲痺一體之意甚屬不合況浙江及江南蘇松等府地窄人稠即豐收之年亦皆仰食於湖廣江西等處今秋成歉收若商販不通必致米價騰貴該部速即行文各省總督巡撫凡有米商出境任便放行使湖廣江西安慶等處米船直到蘇州蘇州米船直到浙江毋得阻撓庶幾有無流通民皆足食以副朕愛養元元至意

雍正二年

重刊通志

卷三

七

上諭我

聖祖仁皇帝壽考作人六十年來山陬海澨莫不家絃戶誦恭紀學  
校志

上諭漕運關係甚大恭紀食貨  
志漕運

旨蠲免江南舊欠地丁恭紀食貨  
志蠲賑

上諭湖廣總督楊宗仁江西巡撫裴率度河南巡撫田文鏡山東巡撫  
陳世倌安徽巡撫李成龍今歲各省秋成大有惟浙江江南沿海地  
方七月十八九等日海潮泛溢近海田禾不無損壞朕軫念災黎惟  
恐失所業經嚴飭各省督撫發倉賑濟多方撫卹但蘇松杭嘉等府  
人稠地狹向來出米無多雖豐年亦仰給於湖廣江西及就近鄰省  
今沿海被災恐將來米價騰貴小民艱食湖廣江西地居上流河南  
山東二省接壤江南今歲俱各豐收安徽寧太等府屬亦俱收成豐  
稔著動湖廣司庫銀買米十萬石江西司庫銀買米六萬石運交浙

江巡撫平糶動河南司庫銀買米四萬石山東司庫銀買米六萬石  
安慶司庫銀買米五萬石運交蘇州巡撫平糶俱著速即辦理選委  
廉幹賢員陸續運送平糶銀兩仍移還補庫其米應於何地交卸湖  
廣江西督撫即咨會浙江巡撫河南山東安徽巡撫即咨會蘇州巡  
撫酌議速行務於蘇松杭嘉四府民人有益毋得怠緩遲誤

上諭直省督撫朕惟四民以士為首農次之工商其下也漢有力田孝  
弟之科而市井子孫不得仕宦重農抑末之意庶為近古今士子讀  
書砥行學成用世國家榮之以爵祿而農民勤勞作苦手胼足胝以  
供租賦養父母育妻子其敦龐淳樸之行豈惟工賈不逮亦非不肖  
士人之所能及雖榮寵非其所慕而獎賞要當有加其令州縣有司  
擇老農之勤勞儉樸身無過舉者歲舉一人給以八品頂帶榮身以  
示鼓勵特諭增

上諭禮部等衙門恭紀學

上諭禮部等衙門及國學諸生恭紀學

上諭直省督撫等官朕惟撫養元元之道足用為先朕自臨御以來無刻不塵念民依重農務本業已三令五申矣但我國家休養生息數十年來戶口日繁而土田止有此數非率天下農民竭力耕耘兼收倍獲欲家室盈寧必不可得周官所載巡稼之官不一而足又有保介田畷日在田閒皆為課農設也今課農雖無專官然自督撫以下孰不兼此任也其各督率有司悉心相勸並不時咨訪疾苦有絲毫妨於農業者必為除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化為勤矣再舍傍田畔以及荒山不可耕種之處度量土宜種植樹木桑柘可以飼蠶棗栗可以佐食柏桐可以資用即榛楛櫟木亦足以供炊爨其令有司

督率指畫課令種植仍嚴禁非時之斧斤牛羊之踐踏奸徒之盜竊亦為民利不小至孳養牲畜如北方之羊南方之豕牧養如法乳字以時於生計不無裨益總之小民至愚經營衣食非不迫切而於目前自然之利反多忽略所賴親民之官委曲周詳多方勸導庶使踴躍爭先人力無遺而地利始盡不惟民生可厚風俗亦可還淳爾督撫等官各體朕惓惓愛民之意實心奉行儻視為具文苟且塗飾或反以擾民則尤其不可也特諭增

上諭順天府尹等京師廣寧門外有普濟堂凡老疾無依之人每棲息於此司其事者樂善不倦殊為可嘉

聖祖仁皇帝曾賜額立碑以旌好義爾等均有地方之責宜時加獎勵以鼓舞之但年力尚壯及遊手好閒之人不得借名混入其中以長浮惰而生事端又聞廣渠門內有育嬰堂一區凡孩穉之不能育養

者收畱於此數十年來成立者頗眾夫養少存孤載於月令與扶衰恤老同一善舉爲世俗之所難朕心嘉悅特賜扁額並賜白金爾等其宣示朕懷並倡率資助之益加鼓勵再行文各省督撫轉飭有司勸募好善之人於通都大邑人煙稠集之處若可以照京師例權巧行之其於字弱恤孤之道似有裨益而凡人怵惕惻隱之心亦可感發而興起也特諭增

上諭各省關差鹽差從來關權鹽稅之設所以通商裕國或用欽差專轄或令督撫兼理無非因地制宜利商便民之至意也朕前於關鹽兩差各下諭旨誥誨諄切但旗員向來相沿成習陽奉陰違任意侈靡不知樽節額外加派苦累商民差滿之日惟恐回京有當差效力之事每以缺額懇求寬限希圖掩飾是以不憚丁寧再加申飭大抵關差之弊皆未講日計不足月計有餘之長策惟知目前小利恣意

侵漁聽信家丁縱容胥吏開關分別遲早肆無厭之誅求報單任意重輕爲納課之多寡飽谿壑者則任其漏稅代爲朦朧不遂欲者則倒篋傾箱一物不免致商賈畏懼裹足不前行旅徬徨越關迂道則困商實所以自困也鹽差之弊尤合重懲飛渡重照貴賣夾帶弊之在商者猶小加派陋規弊之在官者更大若不徹底澄清勢必致商人失業國帑常虧夫以一引之課漸添至數倍有餘官無論大小職無論文武皆視爲利藪照引分肥商家安得而不重困賠累日深則配引日少配引日少則官鹽不得不貴而私鹽得以橫行故逐年之課難以奏銷連歲之引盡皆壅滯非加派之所致與故關差惟在嚴禁苛求使舟車絡繹貨物流通則稅自足額鹽差惟在力除加派使商困少蘇盡復舊業則課自贏餘至於督撫係封疆大吏更當仰體朝廷歸併之意關政不得視爲帶理漫不經心誤任屬員聽其剝削

鹽政不得罔恤窮商獨專厚利硬派州縣計口徵錢夫權關部屬尙有顧忌恐督撫持其長短今歸督撫則何所瞻顧巡鹽御史地方官或不奉約束今歸督撫則孰敢抗違況欽差猶每年更換而督撫兼理則無限期若不實心奉行使風清弊絕則大負歸併之本意矣至將耗羨充課固屬急公但恐以耗羨歸正額而正額之外復加耗羨商民重輸疊出何以堪此朕深悉關鹽擾累之害垂念商民營逐之苦特諭爾等經理權稅者務期奉公守法遴委得人知商旅之艱辛絕箕斂之弊竇通商卽所以理財足民卽所以裕國如自利自便罔上行私責有攸歸其悉遵朕旨特諭謹增

上諭各省兼管關稅之巡撫恭紀食貨志關權

上諭人臣膺命效職果能實心愛民清白自矢則官去民思甘棠畱詠有愈久而不能忘者從古有之若今之生祠書院不知始自何人自

督撫提鎮以及監司守令所在多有究其實不過官員在任之時或係下屬獻媚逢迎或地方紳衿有出入公門包攬詞訟之輩倡議糾合假公派費占地興工甚至園囿亭臺窮極華麗勞民傷財一無顧惜及其後或爲宴會遊玩之場或本官竟據爲產業考其年月則官員去任之後百姓追思而特爲興造者甚少此事向會禁止而踵弊如故當再爲嚴飭嗣後如有仍造生祠書院者或經告發或被糾參卽將本官及爲首之人嚴加議處其現在之生祠書院如果係名宦去任之後民間追思蓋造者准其存留其餘俱著地方官查明一槩改爲別用或爲義學延師授徒以廣文教如此則以無用爲有用以惜民財力杜絕虛浮於地方風俗大有裨益特諭謹增

上諭朕惟明刑所以弼教君德期於好生從來帝王於用刑之際法雖一定而心本寬仁是以虞廷以欽恤垂訓周書以慎罰爲辭誠以民



命至重寧過乎仁毋過乎義也朕自臨御以來一切章奏無不畱心細覽於刑讞一事尤加詳慎惟恐法司未能平允情罪未能悉當朕心深用惻然故凡京城及各直省題奏讞獄但少有可矜者無不法外施仁量加末減獨念朝審重囚其情實者刑科必三覆奏聞句出者方行處決而外省情實重囚惟於秋審後法司具題卽咨行該省無覆奏之例朕思中外一體豈在京諸囚宜加詳慎在外省者獨可不用詳慎乎人命攸關自當同仁一視自今年爲始凡外省重囚經秋審具題情實應決者爾法司亦照朝審之例三覆奏聞以副朕欽恤慎罰之至意特諭增

**上**諭諸王貝勒公滿漢文武大臣官員等朕卽位後於初御門聽政日卽面諭諸王文武大臣諄諄以朋黨爲戒今一年以來此風猶未盡除

聖祖皇考亦時以朋黨訓誡廷臣俱不能仰體

聖心每分別門戶彼此傾陷分爲兩三黨各有私人一時無知之流入於此卽入於彼朕在藩邸時黽勉獨立深以朋黨爲戒不入其內從不示恩亦無結怨設如朕當年在朋黨之內今日何顏對諸臣降此諭旨乎

皇考深知朕從無偏黨欲保全爾諸臣聲名故

命朕繼承大統今日大小臣工所以安然無事得享太平之福者皆我皇考之恩賜也朕平日並未樹立黨援而登踐寶位爾等益可知朋黨之無益矣夫朋友亦五倫之一往來交際原所不廢但投分相好止可施於平日至於朝廷公事則宜秉公持正不可稍涉黨援之私朕今御製朋黨論一篇頒示爾等洗心滌慮詳玩熟體如自信素不預朋黨者則當益加勉勵如或不能自保則當痛改前非務期君臣一

德一心同好惡公是非斷不可存門戶之見卽爾等彼此亦當互相  
砥礪時常勸誠行事共求當理諸臣不負朕心則朕可不負  
皇考付託之重朕之不負

皇考全在爾諸臣之共爲贊成朕爲天下之令主也諸臣果不負朕朕  
豈忍負諸臣乎朕之用人加恩容有未當之處或不能保其將來至  
於治人以罪無不詳慎或寬貸之處人有不能知者卽下一嚴旨亦  
求至當從未隨意輕加呵斥如七十之惡亂舉國皆知發遣在道竟  
竟其械繫行時王大臣內多有贈遺此朋黨未消之明驗也夫朕用  
一人非其黨者嫉之罰一人是其黨者庇之使榮辱不關於賞罰則  
國法安在平嗣後朋黨之習務宜盡除爾等須捫心自問不可陽奉  
陰違以致欺君罔上悖理違天毋謂朕恩寬大罪不加眾儆自干罪  
戾朕雖未必盡行誅戮或干人之中百人百人之中十人爾等能自

保不在百人十人之列乎書云禹拜昌言朕卽效昌言之拜以求爾  
等斷絕黨私同心輔佐盡誠極言勿使朕有差過此朕所深望於爾  
等也凡人於朋友箴規尙不可背況君臣大義耶爾等當上念朝廷  
任用之恩下爲身家子孫之計各勉之慎之特諭謹增

雍正三年

上諭據欽天監奏稱雍正三年二月初二日庚午日月合璧以同明五  
星連珠而其貫宿躔營室之次位當娵訾之宮爲從來未有之瑞應  
請敕付史館等語朕惟日月五星運行於天本有常度是以從古曆  
元可坐算而得然古稱高陽時五星會於營室漢帝時五星聚於東  
井宋祖時五星聚於奎壁史書皆紀以爲祥蓋七政會合數雖一定  
而遭逢其時者實海宇昇平民安物阜之會也若以爲德化所致朕  
方臨御二載有何功德遽能致此嘉祥皆由我

皇考六十餘年聖德神功蟠天際地爲千古不世出之君爲

上天第一篤愛之子所以純禧駢集曆數綿長錫祚垂光至於今日觀

此難逢之嘉瑞朕嗣統以來兢兢業業率由舊章惟以

皇考之心爲心以

皇考之政爲政宅衷圖事罔敢稍越尺寸故邀

上天垂鑒仍如

皇考之御宇綏猷而錫以無疆之福也朕幸逢嘉會不但不敢自居亦

且不敢自謙總由

上天申眷

皇考朕與天下臣民同在福祐之中當與天下臣民共慶之所奏著付

史館并頒示中外該部知道

增

上諭古有諱名之禮所以昭誠敬致尊崇也

恭紀學  
校志

上諭古者視歲之上中爲儲蓄之節蓋官民經畫久遠不爲一時苟且

之計積之於豐年用之於歉歲所謂有備無患法良而意美也朕自

臨御以來宵旰勤求無刻不以民依爲念乃重農積粟之詔屢下而

閭閻卒少蓋藏官倉亦多虧缺卽如直隸保定府去歲頗稱有秋今

春二麥亦熟乃以夏秋雨水過多田禾被澇而民間遂有飢色幾至

流離若非多方賑恤窮民必致失所此皆草野無知食不以時用不

以禮但快目前之有餘罔計異日之不足一遭旱澇追悔無從至於

常平等倉原爲備荒而設乃有司奉行不力多致缺額罪何可道茲

據江南浙江江西湖廣福建河南山西陝西廣東廣西雲南貴州等

省督撫報稱今歲秋成八九十分不等朕覽奏不勝慰悅又重爲吾

民計及長久宜及此時講求儲蓄之道以備將來該督撫等可轉飭

有司徧行曉諭務須撙節愛惜各畱有餘豫爲他時緩急之需社倉

之法亦宜趁此豐年努力為之勿但視為虛文故事朕為吾民籌畫  
養贍之道惓惓於懷無時或釋而吾民自謀其身家若但苟且因循  
不復長顧遠慮則重負朕軫念元元之意矣至於州縣倉儲向有虧  
缺者若不趁此豐收之時速行買補將來發覺斷不姑貸慎之慎之  
特諭增謹

上諭積貯倉糧特為備荒賑濟之用恭紀食貨志儲積

上諭禁止漕船夾帶恭紀食貨志漕運

雍正四年

上諭賑泗州災恭紀食貨志蠲賑

上諭國以民為本民以食為天朕即位以來念切民依舉行耕藉之禮  
殫竭精誠為民祈穀於

上帝乃雍正二年三年藉田疊產嘉禾有至一莖九穗者朕心亦為偶

然之事今據府尹劉於義進呈今歲藉田所產自一莖雙穗三穗以  
至八穗九穗皆碩大堅好異於常穀朕見之心甚慰悅特令宣示廷  
臣朕並非以此為祥瑞誇耀於眾也蓋實有見於天人感召之理捷  
於影響無纖毫之或爽朕以至誠肫懇之心每歲躬耕藉田以重農  
事即蒙

上帝降鑒疊產嘉穀以昭休應似此八穗九穗之穀豈人力之所能強  
為亦豈人君所能強之使有乎天人感應之理朕見之最真最切但  
恐此心不誠耳誠則未有不動者即如從前青海蠢動朕為邊陲憂  
慮虔禱於宮中不數旬而捷音即至疆圉寧謐又如前歲夏間近畿  
雨澤稍愆朕在宮中默禱減膳修省虔誠叩懇不數日而甘霖大沛  
禾稼有秋此皆近年以來朕親行親驗之事至於去年夏秋之間天  
常陰雨而朕在宮中但覺雨水稍多不知其大為民患而李維鈞並

重刊安海通志卷三  
不將畿輔被潦實情具奏是以朕竟不聞知未曾早爲虔禱殫竭誠心以挽

天意而舒民困及蔡珽署直隸總督事務詳細奏聞朕宵旰憂勤幾廢飲食於是截漕發倉多方賑濟京城設廠各邑興工俾窮民皆得餬口是以地方雖被水災而小民不致流離失所朕撫綏憫恤之念實爲迫切今歲二麥豐收禾黍暢茂此皆

上天俯鑒朕衷故加惠黎元而錫以盈寧之慶也蓋天生民而立之君鑒觀在上人君一念敬謹政事無闕天必嘉之佑之一念放逸政事有乖天必儆之戒之此一定之理也況人君撫馭臣庶位處極尊所以賞罰之者獨有

上天耳是以朕每於水旱等事皆實心內省必係朕有過失  
上天儆戒示譴也至於各省旱澇之事朕皆視同一體原無彼此之別

惟是地方相隔路遠彼此偶有水旱有司未必卽行具報及至奏達朕前而緊急之時已過是以朕無從盡其誠心爲之祈禱此其責則全在本省督撫矣督撫受朕委任之重爲朕養育萬民必視百姓之疾苦如痛癢之在己身一遇水旱饑饉必思所以致此之由或因本省之政事吏治有關卽思速爲改易之或因本地之人心風俗不端卽思速爲化導之兢兢業業修省祈禱竭盡誠心一如朕之朝乾夕惕斷無不可以挽回

天意者假若聞朕之政治稍有闕失亦卽直言陳奏不必隱諱如此則官與民聯爲一體臣與君又聯爲一體太和翔洽實意交孚天聽雖高誠呼吸可通矣朕每歲躬耕藉田並非崇尚虛文以爲觀美實是敬

天勤民之至意禮曰天子爲藉千畝諸侯百畝據此則耕藉之禮亦可

通於臣下矣朕意欲令地方守土之官俱行耕藉之禮使知稼穡之艱難悉農民之作苦量天時之晴雨察地力之肥磽如此則凡爲官者皆時存重農課稼之心則凡爲農者亦斷無苟安惰忽之習似與養民務本之道大有裨益著九卿詳議具奏特諭增

上諭爲士者乃四民之首一方之望恭紀學校志

上諭國家設學校以儲養人材鄉會廷試拔其尤者而用之卽古選士造士之遺意也但士子作文有一日之長短縱使主司公明搜羅豈能無遺況去取惟憑文藝其人品之高下才能之優絀無由得知每有出羣拔萃之才屢試不售卽或晚得一第而年力衰邁不堪爲國家任使朕思各省學政奉命課士黜劣舉優係其專責嗣後學政三年任滿將生員中實在人品端方有猷有爲有守之士大省舉四五人小省二人送部引見朕親加考試酌量擢用現在報滿各學政卽

遵照薦舉其到任未久者如有所知亦卽舉出夫一省而舉數士不可謂無人學政巡歷各府三年之久日與士子相親考文察行不得謂不知但能虛公衡鑑所舉必得其人且風聲所樹凡讀書士子必皆鼓舞振興力學敦行求爲有用之儒於士習人材大有裨益該學政其各實心奉行毋得苟且塞責如有徇私冒濫等弊必嚴加治罪

特諭增

上諭各省五經取中副榜恭紀選舉志

上諭朕覽戶部奏銷本章見恩詔內賞給老人一項直隸各省七十以上至百歲以上老民老婦共一百四十二萬一千六百二十五名賞給絹布等件價銀共八十九萬餘兩米一十六萬五千餘石等語凡此老人但就民人而言如仕宦紳士商賈僧道皆不入此數之內洪範以壽居五福之首而昔人稱七十古稀誠以壽爲難得而可貴也

乃今日老人之多至於如此皆由我

皇考聖祖仁皇帝六十餘年以來深仁厚澤休養生息凡山陬海澨僻壤窮鄉無不沐浴

鴻慈涵濡大化太和翔洽壽國壽民所以期頤耄耋眉皓首之人至數百餘萬之多所謂老者以壽終幼孤得遂長者皆我

皇考之賜也從此益加培養日積月累則民間之享高年介眉壽者更不知如何之眾矣此等老人躬際昌明年登上壽大抵皆居心忠厚力行善事之人即有一二年少時未盡醇謹者亦必中年暮齒能自悔悟之人蓋一念修省即荷

上天福祐也是國家有培養之恩而由本人能修善以祇承之非倖而致之者也爾等百姓觀百年之盛事當歡忻鼓舞謹身修德以迓天庥父與父言慈子與子言孝兄弟友恭夫婦和順比閭族黨之間相

親相愛無詐無欺革薄從忠循分守法盡除乖戾之氣爲國家淳樸善良之民則天地佑善錫福長享遐年此自然之理也但生齒日盛食指繁多則謀生之計不可不講爾等百姓當重農桑以順天時勤開墾以盡地利務本業以戒遊惰謹蓋藏以裕久遠而且節省食用愛惜物力毋縱奢侈毋競紛華毋任意糜費以耗有用之財毋但顧目前而忘經久之計朕以勤儉先天下宮禁之中於食餘之物皆不忍棄必令人檢取收貯之數年以來所貯米粟已至數十石之多朕臨御萬方尙多方撙節愛養以爲加惠元元之本爾等小民安可縱口腹之所欲而忘物力之艱難乎爾等誠能體朕諄諄訓誨之意敦善行則心體安務本計則俯仰足惜財用則家室裕人心和樂風俗醇美同爲壽考之人長享昇平之福豈非朕之所厚望哉著該部將朕此旨轉發直省督撫通行所屬郡邑鄉村咸使聞知特諭

上諭帝王體國經邦政治所施惟準乎道理之至當寬嚴賞罰各得其宜若一涉利弊二字便入於私是以孟子云仁義而已矣何必曰利蓋仁所以休養安全義所以裁成化導也朕自承大統四年於茲凡政教號令皆遵法

皇考

皇考在位六十一年

聖謨弘遠

諭旨周詳紀綱法度靡不備舉特當時臣下或有陽奉陰違不能實力遵行者或有事經歷久漸至廢弛者朕在藩邸時知之甚悉卽位以來仰體

皇考仁育義正之心屢降明旨諄諄誥誥誠無非欲內外大小臣僚咸恪遵

皇考之良法美政實心奉行以共成久安長治之盛是朕所行之政皆皇考已申之實訓實未嘗有減損增益也特以歷年既久新進疏遠之臣未能悉知見朕所施之政令遂以爲從前所未有而淺陋寡識之人往往於陳奏內有眾利皆興諸弊盡除等語朕經理天下凡用人行政悉本大中至正之心事至而應惟理所當然從無計及利弊之私意如謂興利除弊則凡平治道路疏濬河渠修葺城垣開墾田畝此國家經理之常典而可謂之興利乎年歲豐歉不齊設有水旱爲之賑饑平糶蠲賦緩徵此朝廷軫恤之恆政而可謂之興利乎老人應賜以衣食則賜之孤獨應恤以錢糧則恤之勸以孝弟本小民自有之天良助以耕桑因閭閻各盡之職業而可謂之興利乎至於盜賊姦宄法所當誅貪官污吏法所應黜豪紳劣衿法所應鋤而謂誅盜奸黜貪污鋤豪劣爲除弊可乎情罪重者予以刑辟情罪輕者予以



以矜釋此又可為除弊乎欲正民風而端士習不得不戒之用休董之用威也將以此為興利乎抑除弊乎念習俗之流於奢靡也朕躬為節儉以身示天下慮農人之惰於南畝也朕親為耕藉以身先天下將以此為興利乎抑除弊乎夫存興利之心即有不利之害有除弊之意即有啟弊之端由此類推治道安得有利弊之名朕又何嘗有興利除弊之舉也

皇考六十餘年有豐功偉烈布在方冊皆因事治事以人治人從不居興利除弊之名而以此頌揚朕之政事朕實不敢當朕亦不願當也外省督撫諸臣未能深悉朕意為此曉諭知之

上諭今歲江南地方秋雨稍多其江安所屬被水之州縣已令該督撫轉飭有司確查賑卹務使小民得所恭紀食貨志儲積

重修安徽通志卷四

皇言紀

世宗憲皇帝詔諭

雍正五年

上諭覽諸王大臣等奏稱河水澄清二千里期逾兩旬為從來未有之瑞懇請升殿慶賀朕嘗言天下至大庶務至繁斷非人主一身所能經理必賴內外臣工協力贊襄然後可以成一道同風之盛若上有涼德之主而下皆臯夔稷契之臣則工虞水火佐理有人政務亦不患其不舉若上有堯舜之主而下皆共工驩兜之輩則耳目股肱無所資藉政務亦必至於廢弛故人君之道以得人為要而人臣之道以奉職為先此一定之理也朕統臨萬方雖刻刻有勵精圖治之念然必賴內外臣工其矢公忠各殫才力然後有實政實效及於吏治

民生方可以感

天和而錫繁祉不然則朕雖有勤政之念豈能事事躬親辦理之也今見數年之中荷蒙

上天

皇考默佑疊錫嘉祥茲又有河清之上瑞朕細推天人感應之理自非無因應是內外臣工能體朕宵衣旰食之懷洗陽奉陰違之習分猷效職有數端之善上合

昊天

皇考之心是以錫茲福慶以厲將來爾等試再思之人事甫修僅有數端之善卽邀

上天

皇考之嘉貺若此儻能益竭忠誠事事皆善則獲福又當何如或由此

而侈然自足怠惰前修則其獲譴又當何如可不慎乎可不懼乎況天道惡盈朕心方且因此益加戒儆所請慶賀典禮朕必不行朕念君臣之間實屬一體

上天

皇考既垂訓於朕朕卽以此訓及諸臣

上天

皇考既賜福於朕朕卽以此福及諸臣凡屬京官自大學士尙書以下主事以上內大臣都統前鋒統領軍統領步軍統領以下參領以上凡屬外官自督撫以下知縣以上武官自將軍提鎮以下參將以上俱著加一級其王公等管理部院都統事務者應如何加恩之處著宗人府議奏自茲以往內外臣工當益加黽勉精白乃心和衷共濟矢勤矢慎秉公去私凜天鑒之匪遙念感應之不爽以至誠至敬

仰承

上天

皇考之眷佑則受福孔多永永弗替矣勉之勉之

上諭從來爲政在乎得人書曰野無遺賢萬邦咸寧蓋賢才登進在位者多則分猷效職庶績自能就理而民生無不被其澤也朕卽位以來加意旁求凡所以延訪擢用之道盡朕心力如現任官員及候補候選科目諸人每特令薦舉遴選引見廣開錄用之途冀收羣策之力又念各省學校之設原以養育人材爰命學政保舉賢能升聞於朝以備任使乃直省學政所舉人數不多又多草率塞責不能副得人之實夫十室之邑必有忠信今直省府州縣學貢生生員多者數百人少亦不下百餘其中豈無行誼醇篤好修自愛明達之士乎著知府知縣官會同各該學教官將府州縣之貢生生員內居家孝友

行止端方才可辦事而文亦可觀者秉公確查各舉一人於今年秋末冬初申報該上司奏聞請旨其或僻遠中學小學實無可舉者令知縣教官出具印結該督撫查實奏聞朕因廣攬人材舉此曠典所以黜浮華而資實用州縣教職等官爲一方師長選賢舉能乃其專責儻敢有輕忽之心虛應故事濫舉非人者定照溺職例革職若或徇情受賄則又加倍治罪八旗之滿州蒙古漢軍亦照此例將人品端方通曉漢文者著該佐領各舉一人如不得其人之佐領亦具印結令該都統彙齊奏聞請旨庶使潛修篤行之士得以表見而國家亦收得人之效矣特諭

上諭外省鄉試房考舊例皆用現任知縣入闈朕思知縣身爲民牧所職地方政務甚爲殷繁每當鄉試屆期赴省入闈動經數月諸事必至耽延遲誤且一縣之中豈可無正印官在署管轄況知縣官到任

以後日理簿書錢穀之事於文藝未免荒疏儻令辦事之時猶必溫習舉業以爲房考持衡之地其勢難以兼顧又本省本縣應試舉子皆卽縣令所管轄之子民於形跡亦涉嫌疑朕意欲將外省房考之例斟酌更定或於鄰近省分舉人進士之員在家候選者臨期調取數十人以爲房考之用交與監臨之督撫秉公掣簽令其入闈分校如此則房考非現任之官旣可於政事不致遲誤而伊等候選在家仍可不時溫習舉業以備衡文之任似爲有益但必須籌畫周詳始可以杜弊端而收科場之實效著九卿悉心詳議具奏

上諭前織造等衙門貢獻物件其所進御用繡線黃龍袍曾至九件之多又見燈幃之上有加以繡線爲飾者朕心深爲不悅比卽切加誡諭近因端陽佳節外間所進香囊宮扇等件中有妝飾華麗雕刻精工亦甚至於繡扇者此皆糜費於無益之地開風俗奢侈之端朕所

深惡而不取也外省諸臣凡有進獻方物土儀朕畱於宮中服用者所需實不多每隨便頒賜諸王內外大臣等所以推廣恩澤也如黃龍繡緞之類旣不可以頒賜諸王大臣不過收貯於宮中耳其於華燦之物在朕用之心中尙覺不安若賜諸王大臣在伊等亦覺非分豈非糜費於無益之地乎況朕素性實不喜華靡一切器具惟以雅潔適用爲貴此朕撙節愛惜之心本出於自然並非勉強數十年如一日者凡臣進獻惟應量加工價少異於市肆之物卽可見諸臣恭敬之忱何必過於工巧而後見其誠悃乎工匠造物之情喜新好異無所底止見一靡麗之式樣初則競相摹倣後必出奇鬪勝以相誇此雕文纂組之風古人所以斥爲奇衷豈可導使爲之而不防其漸乎蓋治天下之道莫要於厚風俗而厚風俗之道必當崇儉而去奢若諸臣進獻之物以奢爲尙又何以訓民間之儉約乎朕觀四民之

業士之外農爲最貴凡士工商賈皆賴食於農以故農爲天下之本務而工商皆其末也今若於器用服玩之物爭尙華巧必將多用工匠以爲之市肆之中多一工作之人卽田畝之中少一耕稼之人此逐末之所以見輕於古人也且愚民見工匠之利多於力田必羣趨而爲工羣趨爲工則物之製造者必多物多則售買不易必至壅滯而價賤是逐末之人多不但有害於農而並有害於工也小民舍輕利而趨重利故逐末易而務本難苟爲官者遽然繩之以法必非其情之所願而勢有所難行惟平日畱心時刻勸導使小民知本業之爲貴又復訓飭閭閻尙樸實工作之間不事華巧如此日積月累遂成風俗雖不必使爲工者盡歸於農然可免爲農者相率而趨於工矣至如士人所業在乎讀書明理以爲世用故爲四民之首然父兄之教子弟亦當觀其才質如何若果聰悟慤慎洵可望其有成則

當使之就學而爲士若愚濁中下之質讀書難通卽當早令改業歸農使之盡力於南畝以爲仰事俯育之資誠恐讀書不成而又粗識數字曠廢閒遊必致非分妄爲越禮犯法是浮慕讀書之名而不得其道其傷農而害本者爲尤甚亦不可不知戒也朕深揆人情物理之源知奢儉一端關係民生風俗者至大故欲中外臣民黜奢禁末專力於本人人自厚其生自正其德則天下共享太平之樂矣昔人云由儉入奢易由奢入儉難不知奢者取用少而費力多儉者取用多而費力少則由奢入儉乃人人行之甚便者不可爲難也中外臣民其深體朕意朕自身體力行諸王內外大臣文武官弁與鄉紳富戶當欽遵朕諭期其勉之勿視爲具文特諭

上諭近因考試新科進士以宋儒所云士人當有禮義廉恥句爲論題諸進士試卷進呈朕躬自披覽見其文藝之工拙優劣固有不同然

大槩皆詞章記誦之常談見解卑淺識量狹隘未能真知題中之理蘊而實有發明蓋所言止於儀文末節而已非禮義廉恥之大者也朕則謂古人言禮義廉恥國之四維者蓋以天下之大四海之眾皆範圍其中而不可須臾離而士人貴有禮義廉恥之說所指甚遠所包甚宏上之爲人君下之爲人臣皆當求其大者以爲務而不可屬於儀文末節之間也以禮言之如化民成俗立教明倫使天下之人爲臣者皆知忠爲子者皆知孝此禮之大者也進退周旋俯仰揖讓此禮之小者也以義言之如開誠布公蕩平正直使天下之人無黨無偏和衷共濟此義之大者也然諾不欺出入必謹此義之小者也以廉言之理財制用崇儉務本使天下之人家給人足路不拾遺盜賊不生爭訟不作貪官汙吏無以自容此廉之大者也簞食豆羹一介不取此廉之小者也至於以恥言之爲人君者憲天出治誠和萬

民則當以一夫不獲其所爲恥爲人臣者行義達道兼善天下則當以其君之不爲堯舜爲恥若夫迂拘曲謹如鄉黨自好之類不失常於人不失色於人此乃知恥之小者耳曾何足以盡有恥之道乎欲爲君盡君道欲爲臣盡臣道而其道曾不外禮義廉恥之四端士人者必當以天下爲己任其身卽爲臣之身而有致君之責者豈可徒知禮義廉恥之小節而不知禮義廉恥之大者乎夫禮義廉恥由一端之小者擴而充之皆可以保四海然必知其大者而務之自可不遺於其小若或徒窺小節而不知其大則迂拘曲謹止圖檢束一身而不敢任天下之重此則細民之行而非士人之道也孔子曰人能弘道非道弘人其可不勉自奮立乎朕引見新進士之時卽欲面加訓諭因天氣炎熱恐伊等暫時跪聽不能悉心領會今特詳爲宣示朕願與大小諸臣交相做勉詳思禮義廉恥之大者身體力行則人

心風俗蒸蒸日上而唐虞三代之治庶幾其可復見矣特諭

上諭朕念切民依今歲令各省通行耕藉之禮爲百姓祈求年穀幸邀上天垂鑒雨暘時若中外遠近俱獲豐登且各處皆產嘉禾以昭瑞應而其尤爲罕見者則京師藉田之穀自雙穗至於十三穗御苑之稻自雙穗至於四穗河南之穀則多至十有五穗山西之穀則長至一尺六七寸有餘又畿輔二十七州縣新開稻田共計四千餘頃約收禾稻二百餘萬石暢茂穎粟具有雙穗三穗之奇廷臣僉云嘉禾爲自昔所未有而水田爲北地所創見屢詞陳請宣付史館朕惟古者圖畫豳風於殿壁所以誌重農務本之心今蒙

上天特賜嘉穀養育萬姓實堅實好確有明徵朕祇承之下感激歡慶著繪圖頒示各省督撫等朕非誇張以爲祥瑞也朕以誠恪之心仰蒙

帝鑒諸臣以敬謹之意感召

天和所願自茲以往觀覽此圖益加儆惕以修德爲事神之本以勤民爲立政之基將見歲慶豐穰人歌樂利則斯圖之設未必無裨益云特諭

上諭民生日用所需制錢最爲切要朕專爲便民起見屢頒諭旨嚴禁銷燬制錢並令京城及各省督撫駐劄之省城不許鑄造黃銅器皿三品以下官民不得私用銅器此朕欲期錢文豐裕爲小民易於資生非朕有所需用也已曾諄切詳諭不啻再三自曉然於天下矣京城現今奉行錢價已覺稍平乃近聞各處督撫駐劄之省城銅器店內仍用黃銅鑄者甚多此明係各督撫奉朕諭旨之後不曾實力奉行只以告示曉諭虛文掩飾而已朕時時切諭內外諸臣若朕所頒諭旨有不便於民之處卽當據實敷陳請弛其禁斷不可陽奉陰違

有失爲政之體各省督撫等寧不聞之乎且銷燬制錢以鑄造銅器之弊朕向因錢局鼓鑄日增而錢文日見短少知其情事有灼然者嗣於京城內果屢次拏獲銷燬之奸民而欽差官員至甘肅地方亦見有燬錢爲器者與朕所料若合符契則銅器之必當嚴禁明矣省會乃督撫駐節之區耳目最近政令易行非若遠鄉僻壤之難於稽查也若果實心遵奉甚屬易事朕爲制錢籌畫宵旰焦勞各省地方官辦運銅斤亦甚費經營跋涉之苦然後官局得以鼓鑄錢文以資百姓之用夫以鑄制錢如此之難而奸徒貪財射利竟將已成之錢復以銷燬蠹國害民孰大於此故禁用銅器者所以杜燬錢之源也乃督撫畏一二犯法貪利工商之怨望背朕旨而輕民計是何心也今特再加訓誡各省督撫務宜實力奉行朕各省令人查訪儻仍前疏忽定將督撫嚴加處分至於黃銅器皿亦非人生必不可缺之物

鐵錫瓦木可以代銅器者甚多朕前諭旨甚明況交官仍得價值又何樂而不爲但從前曾約議三品以上許用黃銅今猶覺濫用者多嗣後惟一品官員之家器皿許用黃銅餘著徧行禁止如有藏匿私用不肯交官者槩以違禁論中外臣民其知朕意毋忽特諭

上諭王公大臣官員等朝服頂帶俱有定制但平時所用服色未辨等級其應如何分晰之處着議政大臣九卿會議具奏

上諭自雍正二年以來朕躬耕藉田而藉田之中每歲必產嘉穀上年自雙穗至於九穗今歲則自雙穗至於十三穗在廷諸臣及京都耆庶皆驚訝以爲奇朕之宣示於眾者並非矜詡誇張以爲祥瑞蓋實有見於天人感召之理捷於影響而朕敬

天之心至誠至切願與內外大小臣工共勉之也稼穡爲天地之寶實生民之命攸關我



聖祖仁皇帝臨御六十餘年無刻不以重農力田爲先務仰觀天時俯察地理辨土性而課人功咨雨暘而防旱潦旰食宵衣偶遇雨澤愆期

聖心憂勞之切侍側臣子皆惶悚不寧所以爲萬民謀粒食者至矣盡矣朕瞻仰目覩者四十餘年今纘承大統竭誠效法念切民依每年虔祀

先農躬耕帝藉仰蒙

上天眷佑疊錫嘉禾信而可徵纖毫不爽是以特頒諭旨令各省守土官共舉耕藉之禮爲萬方百姓祈禱秋成今見各省督撫奏報前來處處風雨均調春麥秋禾並登豐稔雖邊遠荒僻之地亦慶有秋惟直隸湖廣安徽數州縣近水最低之處常年被潦者略有浸注亦不爲災是今歲可稱大有年矣朕感

上天之垂慈慶下民之受福而推求其故良由今年各省初耕藉田各該有司自然小心敬慎齋戒虔誠是以感格

上蒼而獲此盈寧之錫儻從此益加敬謹不懈初心則歲歲屢豐可以預必爾督撫等可通行曉諭所屬官民當凜

帝鑒之匪遙勿視耕田爲故事永矢敬恪以迓

天和天下臣民受福斯朕之福也思之慎之毋忽朕言

上諭定例凡在京各部院官因病告假回籍調理者病痊之日仍以原衙門補用至在外各官一經告病卽令休致所以防不肖有司之託病規避也但外官有地方之責果係患病不能辦理事務自應呈請離任病痊之日雖有才具優長之員格於成例不得起用殊爲可惜從前有府縣官員告病者朕降旨調來引見見其才尙可用命醫調治痊可卽行補用誠以人才難得雖片長薄技不忍棄置嗣後外官

告病督撫查明確實具題令其回籍調治痊可有情願起用者於本籍起文赴部引見仍以原缺補用如此則可以杜規避之端而人材亦不致淪棄矣特諭

上諭內外諸臣

恭紀選舉志

上諭江南總督

恭紀食貨志蠲賑

上諭鄂爾泰所奏江南水道事宜甚屬周詳但摺內有越職陳奏字樣凡內外大臣越職辦事固為不可至若有關於國計民生者雖非己身職任之事既有見聞即當據實入告方合公忠體國之義此乃盡職非越職也如孔毓珣經過鳳陽地方即以水利情形奏聞朕甚嘉之鄂爾泰所奏著發與范時繹陳時夏齊蘇勒陳世瑄鄂禮就近詳加相度悉心妥議具奏

上諭自古治水之法惟在順其自然之勢而利導之蓋水之為害者大抵由於故道湮塞使水不得徑直暢流以致泛溢而為患但恐徑直之路湮塞年久或民間既已蓋造室廬開墾田畝或且安葬墳墓人情各顧其私不知遠大之計今見欲於此地開濬河道則因循規避百計阻撓而司其事者未免惑於浮議遂致遷就紆回別開溝洫苟且從事而不能成一勞永逸之舉此治水之通弊也昨岳鍾琪奏稱陝西現在興修漢渠以濟民田亦以開濬之處不無礙於墳墓故爾遲回朕諭之曰果係民間墳墓所在當給與買地之價令其遷葬民自樂從岳鍾琪云若果給與遷葬之費則公私均便小民無不樂從者朕已諭岳鍾琪在陝遵行目今江南地方現在興修水利著該撫與欽差官員亦照此辦理若水勢必由之路有礙墳墓即於興修水利錢糧內動支銀兩給與本人令其改葬俾小民既有營葬之資而河工亦收利導之益則水患可除水利可興地方永遠蒙福矣

雍正六年

上諭國家政務必得其人而後理朕加意旁求多方遴選惟期百司庶職俊乂在官以收得人之效但各等職業需人之處甚多而督撫等又屢屢奏請現在赴部銓選之員不敷揀用因思自古人臣爲國有以人事君之義孔子論舉賢才之道亦云舉爾所知可見凡人生平必有深知篤信之才足備朝廷任使者果能以公忠爲心自無薦舉不得其實之理也茲特降諭旨著京官大學士以下主事以上之漢軍漢人外官督撫以下知縣以上之滿洲漢軍漢人每人各舉一人除現任知縣以上官員不必保舉外或係舉貢生監或係山林隱逸果有品行才猷可備任使者卽親戚子弟亦不必引避嫌疑令京官外官皆得據實保舉至外官所轄之現任佐貳雜職等屬員亦准其保薦此所保薦之人如係京官所舉者卽令本人寄信喚令來京自

行交送吏部彙齊引見其外官所舉之舉貢生監山林隱逸等人亦令具文開載履歷考語交與所舉之人齎文赴部引見至所舉之屬下佐貳等員著申送該督撫驗看出具考語然後送部引見朕從政務需人起見開誠布公以期集思廣益內外大小臣工等其受國恩時懷報效之願今奉特旨准令保舉實屬難逢之會自應秉公據實以展臣子之心必無有徇私冒濫以自蹈欺罔者儻或舉非其人將來覺察或試用不稱責有攸歸勉之勉之特諭

上諭上年聞湖廣廣東江西等省之民因本地歉收米貴相率而遷移四川者不下數萬人已令四川督撫設法安插毋使失所但思上年江西收成頗好卽湖廣廣東亦非歉歲不過近水之地略被淹損何至居民輕去其鄉者如此之眾也因時時畱心體察今據各處陸續奏聞大約因川省曠土本寬米多價賤而無知之民平日旣懷趨利

之見又有傳說者謂川省之米三錢可買一石肉價則一錢可買七斤此等之言最易動愚賤之聽又有一種包攬棍徒極言川省易於度日一去入籍便可富饒每戶得銀包送愚民被其煽惑不獨貧者墮其術中卽有業者亦鬻產以圖富足其情弊大抵如此獨不思川省食物平賤之故蓋因地曠人稀食用者少是以如此若遠近之人雲集一省則食之者眾求如從前之賤價豈可得乎況彼此相隔或至千里或數千里小民離棄鄉井扶老挈幼跋涉山川安有餘資以供路費中途困厄求救無門不相率爲匪勢將爲溝中之瘠矣此時追悔亦復何及豈非輕舉妄動者自貽之累乎草野識見庸愚必須訓示爲地方有司者當撫綏之於平日而勸教之於臨時開其愚蒙恤其窮困念念如保赤子時勤訓導使百姓知故土之可戀轉徙之非宜則愚民之不醒悟者亦少矣且各省皆有可墾之田土卽如廣

東高雷廉三府儘有荒地可以耕鑿而所以任其廢棄者聞其故有二一則民俗好爲爭競也當其未墾之時則置之不問及至既墾之後則羣起相爭是以將可種之壤拋爲曠土甚爲可惜一則墾田必需工本而寒苦之民不能措辦以致委諸草莽爲有司者當如何經其疆界以息爭端助其耔種以資工作寬其升科之年優其上農之賞則百姓斷無有不踴躍鼓舞趨事赴工者矣凡地方荒棄田土皆地方官不實心愛養體恤百姓之所致也朕宵旰勤勞無刻不以小民生計爲念數年以來所以爲閭閻籌畫者盡朕苦心茲頒諭旨並非禁百姓之謀食於他方也祇以愚民無知圖利心切惑於邪說見異而遷遂輕舍故鄉甘受流離之苦朕心實爲不忍不思在彼在此皆吾赤子若本籍果逢歉歲難以資生該地方有司自能仰體朕心卽時奏聞朕必沛以恩膏使之得所何必分散他方以希冀必不可

得之利乎著各督撫將此通行曉諭所屬官民等咸使聞知特諭  
上諭覽福建巡撫常賚奏稱羅源縣孝子李盛山割肝救其母病母病  
愈後李盛山傷重身故請加旌表部議以割肝乃小民輕生愚孝向  
無旌表之例應不准行朕念割肝療疾事雖不經而其迫切救母之  
心實難得而可憫已加恩准其旌表矣嘗讀韓愈之文曰母疾則止  
於烹粉藥石以爲事未聞毀傷肢體以爲養苟不傷於義則聖賢當  
先眾而爲之矣又讀朱子書曰割股固自不是若誠心爲之不求人  
知亦庶幾今乃有以此要譽者是先儒論及此者屢矣本朝順治年  
間定例割股或至傷生臥冰或致凍死恐民倣倣不准旌表伏思我

世祖皇帝

聖祖皇帝臨御萬方立教明倫與人爲善而於此例慎予旌表者誠乃  
天地好生之盛心聖人覺世之至道視人命爲至重不可以愚昧而

誤戕念孝道爲至弘不可以毀傷爲正理立法垂訓實有深意存焉  
但向來地方有司未嘗以聖賢經常之道與國家愛養之心明白曉  
諭開導編氓是以愚夫愚婦救親而捐軀殉身而殞命者往往有之  
既有其事若不予以旌表恐無以彰其苦志而慰其幽魂所以數十  
年來雖定不予旌表之例而仍許其奏聞且有邀恩於常格之外者  
仰見

聖祖皇帝哀矜下民之

聖心固如是之周詳而委曲也孝經曰身體髮膚受之父母不敢毀傷  
孝之始也孟子曰事孰爲大事親爲大守孰爲大守身爲大此皆言  
人子一身乃父母之遺體雖一髮一指不可偶有虧損以傷父母之  
所貽也孔子曰父母惟其疾之憂蓋父母愛子之心無所不至儻有  
疾病尙以爲憂設有不肖忤逆之子父母且怒而矜之其純孝之子

而父母之憐愛又當如何也豈有以己身患病之故割其子之肝肉充飲饌而和湯藥其父母之心斷無不驚憂慘惕不安之理也若因此而至於傷生又豈父母所忍聞者乎夫父母有疾固人子所當盡心竭力之時而孝道多端實不容效命捐軀於一節孔子曰生事之以禮死葬之以禮祭之以禮是人生孺慕之誠原通百年而無間者也人子一身承先啟後負荷甚鉅若舍生殞命於倉卒之間而忘宗祀繼續之重恐非所以爲孝也況人子於親本乎天性儻能盡至誠純孝之實則親病雖篤呼籲請禱力省一身之過誓願爲一正人如此必能感天地動鬼神何須割肝剖股以爲回生之良劑乎家庭之行惟在至誠至誠善體親心不必以驚世駭俗之爲著奇於日用倫常之外也至若婦人從一之義醮而不改乃天地之正道而其間節婦烈婦亦有不同者烈婦以死殉夫慷慨相從於地下固爲人所難

能然烈婦難而節婦尤難蓋從死者取決於一時而守貞者必歷夫永久從死者致命而遂已而守貞者備嘗其艱難且烈婦之殉節捐軀其閒情事亦有不同者或迫於貧窶而寡自全之計或出於憤激而不暇爲日後之思不知夫亡之後婦職之當盡者更多上有翁姑則當奉養以代爲子之道下有後嗣則當教育以代爲父之道他如修治蘋蘩經理家業其事難以悉數安得以一死畢其責乎是以節婦之旌表載在典章而烈婦不在定例之內者誠以烈婦捐生與割肝剖股之愚孝其事相類假若倣倣者多則戕生者衆爲上者之所不忍也向來未曾通行曉諭朕今特頒諭旨著地方有司廣爲宣布務期僻壤荒村家喻戶曉俾愚民咸知孝子節婦之自有常道可行而保全生命之爲正理則倫常之地皆合中庸不負國家教養矜全之德矣儻訓諭之後仍有不愛軀命蹈於危亡者朕亦不樂加旌表

以成閭閻激烈之風長愚民輕生之習思之思之特諭

上諭大凡為臣者必以報稱君上為心而不得有瞻顧身家之念從古聖賢之所以教忠皆是道也蓋在平時則正其誼不謀其利明其道不計其功孝弟忠信一一皆盡其實而不可有一毫之虛假及至居官則國爾忘家公爾忘私盡屏其偏陂黨同之習悉去其沽名市惠之端此之謂實心任事而智名勇功於是乎出內不欺衾影即外不愧大廷矣夫臣下之用心在上未有不燭照其微洞悉其隱者古之良臣有嘉謀嘉猷則入告於內而順應於外其誠意之交孚何如其懇摯苟或挾詐任術飾貌修文隱微有潛伏之私則必不能忠敬以事上而上有不知其情偽者乎凡有學古入官之寄者宜矢之以至誠將之以篤敬秉虛公以揆大中之則務正直以遵王道之平本忠君為國之實心為立身行道之大務以此自勉更以此交勉可以成

明良一德之盛矣特諭

上諭積貯米穀所以備早澇緩急之需恭紀食貨志儲積

上諭據河道總督齊蘇勒奏稱改修山圩滾水壩三座即令河兵將沿

河舊存廢石運用不須另動錢糧今工程俱已告竣等語恭紀河渠志

上諭據編纂一統志總裁官大學士蔣廷錫等奏稱本朝名宦人物各

省志書既多闕略即有采錄又不無冒濫必得詳查確核采其行誼事跡卓然可傳者方足以勵俗維風信今傳後請敕諭各該督撫將本省名宦鄉賢孝子節婦一應事實詳細查核無闕無濫務於一年之內保送到館以便細加核實詳慎增載等語朕惟志書與史傳相表裏其登載一代名宦人物較之山川風土尤為緊要必詳細確查慎重采錄至公至當俾偉績懿行逾久彌光乃稱不朽盛事今若以一年為期恐時日太促或不免草率從事著各省督撫將本省通志

重加修輯務期考核詳明采摭精當既無闕略亦無冒濫以成完善之書如一年內未能竣事或寬至二三年內纂成具奏如所纂之書果能精詳公當而又速成著將督撫等官俱交部議敘儻時日既延而所纂之書又草率濫略亦即從重處分至於書中各項分類條目仍照例排纂其本朝人物一項著照所請將各省所有名宦鄉賢孝子節婦一應事實即詳查確核先行彙送一統志館以便增輯成書

欽此

謹增

上諭漕船過淮

恭紀食貨志漕運

上諭各關開放船隻

恭紀食貨志關樞

上諭向來有司官補授之時迴避本省蓋因地方密邇恐其中有嫌疑牽制等弊也朕思江南之上江下江湖廣之湖北湖南陝西之西安甘肅雖同在一省中而幅員遼闊相距甚遠定制各設巡撫司道以

統轄之其情形原與隔省無異則官員選補不過有同省之名而並無嫌疑牽制之處必須迴避况既係同省則於彼處人情土俗較他省之人更為熟悉未必不於地方有所裨益嗣後凡江蘇安徽湖北湖南陝西甘肅諸處府州縣以下官員得本省之缺不在本籍巡撫統轄之內者不必令其迴避其相隔在五百里之內者仍照隔省迴避之例一體遵行

上諭嘗思歲時雨暘之各地不同者其故或由於朝廷政事有所闕失或地方官吏乖厥職守或民間習俗澆漓人心僞薄皆足上干天和致使災祲此理數之必然纖毫不爽者數年以來朕已諭之詳矣上年直隸通省地方收成豐稔惟宣化府所屬之宣化懷來保安三州縣交界之處廣約四十里長約百里獨愆雨澤頗覺亢旱朕心即疑地方官民恐有招致之由秋間口北道王棠來京朕令進見曾經諭



重刊安徵通志卷四  
及今據王棠摺奏宣化懷來保安等處去年夏秋亢旱今春他處皆  
得瑞雪而此地獨少二月閒臣因公出親勘得雞鳴驛新保安之間  
有古惠民渠一道灌田數百餘頃旗民互訟歷三十餘年未曾結案  
臣詳勘渠道先剖曲直繼將上年所奉上諭再四宣布勸使回心一  
時旗民人等頂頌皇仁卽時感悟分渠共溉永息爭端果於三月初  
一二等日連降瑞雪平地尺餘春耕有賴萬民稱慶等語王棠此奏  
實乃天人感應捷於影響之至理不可視爲渺茫蓋人之所以爲心  
卽天之所以爲心儻一方之中彼此猜疑構爭起訟人懷不平之氣  
斯天地之氣亦鬱然湮塞於一方不能和暢寬舒有不雨暘失序者  
乎嘗思愚民之情罔知自省每以旱潦不齊之故專歸咎於朝廷夫  
天心仁愛下民雨暘早潦乃億兆生命所關如果人君一身有過則  
彼蒼所以降之罰者當自有道豈忍移其咎於下民而加以水旱之

災使無辜之億萬生靈悉受困阨乎卽如直隸地方全省豐收而宣  
化百里之閒獨以民氣不和致罹荒歉此卽近事之顯然昭著者其  
他與此相類之處不可勝數古聖有言萬方有罪罪在朕躬朕躬有  
罪無以萬方今朕此言非爲人君寬解而推卸其責於臣民也君民  
上下原爲一體嘗見直省督撫官員等每遇年歲豐登輒曰此皇上  
之洪福也此語朕從來不受朕無自私之福以天下人之福爲福若  
吏治澄清民風淳厚以致時和年豐天下人各受其福卽朕之福也  
若官吏壞法營私黎庶囂陵成習以致召爲災異此皆用人不得其  
當化導未盡其方天下不能共受其福卽朕之歉於福也人君原無  
可諉之責而臣民自當各盡其道朕以實心實政乾惕於上天下臣  
民果能黽勉修省同歸於善以感召於下則太和之氣流行於宇宙  
閒災沴何自而生雨雪應時而降人歌樂利百室盈寧以同受

上天之慈恩豈不美歟著各省督撫通行所屬咸使聞知特諭

上天諭屢年以來朕以天人相感之理諄諄曉諭內外臣工蓋朕實切敬天勤民之念於寤寐之中而確見其感應之不爽尤願各省督撫有封疆之重任者體朕此心至誠至敬各盡其道以為感格

上天之本惠我蒸民其登衽席朕並非以年穀之順成有意歸美於大吏亦非以雨暘之差忒強欲卸責於臣工也假使為督撫者因朕有地方豐歉由於吏治得失之諭旨而欲自彰其善自護其短於奏報秋成也則或有溢美之詞而奏報歉收也則或有諱災之意似此則事

天為不誠事君為不忠臨民逮下為不仁不信有此數端而欲荷

上天嘉祐錫福凝禧有是理乎况粉飾一己之聲名而不顧民生之休戚其何以對所屬之官民而無愧怍乎朕畱心體察覺近來督撫等

之奏報年穀閒有此弊不得不通行曉諭以防其漸在爾督撫等自思之有則改之無則加勉况朕之見聞甚廣訪察維勤儻掩飾於此而敗露於彼豈不自取朕之輕視乎人臣事君之道惟以誠實無欺為本爾督撫等其其勛之特諭

上諭各州縣之設立常平倉積貯米穀原以備地方一時緩急之需所關甚重

恭紀食貨志儲積

上諭朕即位以來屢有臣工條奏各處地方官徵收落地稅銀交公者甚少所有贏餘皆入私橐國計民生並受其累者雍正三年又有人條奏廣西梧州一年收稅銀四五萬兩不等止解正項銀一萬一千八百兩潯州一年收稅銀四千六百兩應令該府查核據實奏聞並令各省地方官員等抽收稅銀之處俱據實奏報等語隨經九卿議令各省督撫遴委廉幹能員監收一年之後看其盈餘若干奏聞候

旨等語朕思孟子言治國之道首稱取於民有制所謂有制者卽一定額徵之數也若稅課之屬無顯然額徵之數則官吏得以高下其手而閭閻無所遵循卽如從前各處稅課經地方官徵收有於解額之外多數倍者且有多至數十倍者旣無一定之章程則多寡可以任意其弊不可勝言屬員旣已貪取則上司必致苛求官員旣已營私則胥役必致橫索日積月累漸有增加之勢而難於稽查豈非民生之隱患乎朕是以允從條奏所請及九卿所議令各省督撫遴委賢員監收一年以定科則其徵收不及舊額者亦令奏聞降旨裁減年來報出贏餘之處朕皆令畱於本地或作各官養廉之需或爲百姓公事之用使官員用度有賴則自不妄取民財使地方公用有資則卽可寬恤民力無非以小民之財物仍用之於民間不令飽貪官污吏之慾壑而已若該督撫等果能督率有司奉行盡善將一年所

收者悉行奏聞不及額數者請旨減免則賦有常經萬民共受其福矣乃聞外省中多有奉行不善者如廣東廣西地方則假稱奉旨歸公之名而有加嚴之弊又聞山西落地稅務甚多潞澤二府更甚陵川一邑僻處山中向無額稅今年五月新行添出百姓頗以爲苦又垣曲絳縣地方名橫嶺關係晉豫通衢行人絡繹舊設巡檢一員稽查逃盜並無稅課今該巡檢於往來貿易之人每遇一馱索錢十文二十文不等民有怨言以朕所聞如此則他省之類此者不少矣以朕愛民除弊之善政而庸劣有司奉行舛錯借歸公之名或肥身養家或爭多鬪勝以致肩挑背負之微物皆徵收稅課而該督撫等又不悉心稽查民間苦於擾累或起朝廷加稅之疑獨不思朕心愛養斯民數年以來如江南浙江江西三省額徵錢糧則永遠豁免六十餘萬各省每年蠲免之正賦又一二百萬不等而發帑爲地方興修

工程者又不下數百萬此中外臣民所共知者豈有加惠黎元於數  
千百萬之帑金並不吝惜而轉與小民爭此蠅頭之利乎又如江南  
通州落地稅原額八百兩自康熙三十四年以後每年止報收二百  
餘兩至三百兩不等屢經戶部駁查至雍正五年陳時夏始將通州  
渡口稅銀五百兩已歸併海關徵收是以祇存三百兩情由咨覆戶  
部經戶部行令該撫確查保題至今三年未見題奏此又怠玩公事  
不恤民隱之一端也至於提解火耗乃均平通便之道官員有養廉  
之資民間無苦派之擾上司無受餽遺徇情瞻顧之私下屬無請託  
鑽營暗通賄賂之弊種種有益於吏治民生之處屢頒諭旨甚明從  
前督撫中有請將耗羨歸公者朕切加訓飭蓋此項乃民間之物惟  
有用之於本地之官民用之於本地之公事若將絲毫歸公是朕利  
其所有矣朕必不爲也聞廣東火耗從前是加二有餘自楊宗仁在

任時定爲加一今藩司提解七分州縣已將耗羨加至一七其中尙  
有戩頭各項合計仍是加二廣東一省如此或他處官員亦有因所  
得養廉不能供其奢靡之浪費而設法巧取於民督撫等失於覺察  
者亦未可定提解火耗之舉始於諾敏之在山西朕曾屢次降旨此  
乃通變宜民之舉若奉行得人則官民共受其益儻奉行不善則不  
能有益於地方各省中有不能行者有不便行者悉皆聽之不可勉  
強一例通行也朕之前旨甚明是以晉省得諾敏豫省得田文鏡果  
然經理得宜此舉遂成善政如廣東等省未得有如諾敏田文鏡之  
人無怪屬吏之假公濟私生事擾累也夫以朕愛養百姓體恤官吏  
之苦心該地方有司不能遵奉宣布且緣以爲奸使利歸於己怨歸  
於上此等之人非尋常貪贓枉法者可比其意欲以擾亂國政結怨  
民心如查嗣庭陸生楠等之懷藏逆志其罪斷不宥各直省督撫將

朕此旨刊刻頒布所屬大小官員及鄉邑軍民人等知悉自諭到通  
行之後儻仍有借清查稅額耗羨歸公之名剝削商民加添重耗者  
一經發覺將經徵之員於本地方卽行正法其該管各上司失於覺  
察者亦必從重治罪決不寬貸特諭

上諭朕平素尊奉

先師至誠至敬雍正二年闕里

文廟不戒於火此時廷臣援明代弘治前事爲言而朕心引過自責親  
詣太學

文廟虔申祭告特發帑金命大臣等督工修建凡殿廡制度規模以至  
祭器儀物皆令繪圖呈覽朕親爲指授遴選良工庀材興造虔恪之  
心數年以來無時稍閒今

大成殿上梁前二日慶雲見於曲阜卿等歸美朕躬之詞朕不克當或

者

上帝

先師鑒朕悚惕誠敬之心現茲雲物昭示瑞應朕不敢矜言祥瑞但能  
功過相抵朕之幸也應擇日躬詣太學

文廟祭告以申感慶之衷一切禮儀著該部速議具奏朕躬被

先師之福佑普天士子誦法服膺同受

聖人之澤著將明年會試取中額數廣至四百名壬子科各省鄉試每  
正額十名加中一名其十名之外有零數者亦加中一名此朕體奉  
先師樂育之盛心特行造就人材之曠典諸士子其各興文敦行益加  
勉旃所請宣付史館之處知道了

上諭在京八旗兵丁朕悉心爲之籌畫其家若有吉凶之事需用之費  
無所取辦實爲拮据可憫特給內庫銀兩王大臣等營運生息以備

兵丁一時之用今思外省駐防之滿洲漢軍兵丁等亦當一體加恩江寧杭州西安京口荊州廣東福建寧夏右衛共九處每處賞銀二萬兩天津河南潼關乍浦成都共五處每處賞銀一萬兩俱著布政司庫內支給交與該將軍副都統等公同存貯營運生息如該處駐防兵丁家有吉凶之事將生息銀兩酌量賞給以濟其用其本銀永遠爲存公生息之項不令彼繳還該將軍副都統等務須盡心辦理使兵丁均霑實惠儻該管大臣官員有私自侵蝕挪移或委任非人以致本利虧缺者定行從重治罪仍於該管及委用管官名下嚴追還項其營運利息之處亦爲公平辦理儻有指稱官銀名色或佔奪百姓事業或重利刻剝閭閻與商賈小民爭利擾累地方督撫不時稽查卽行參奏如督撫或徇隱不奏經朕訪聞必將該督撫一併議處此項本利銀兩每年出入之數交與在京八旗都統副都統查核

一旗或管一省或管二省著怡親王大學士等酌量派定每歲底各省該管大臣官員造冊齎送各該旗查核奏聞再各省督標撫標提標兵丁等亦倣此例每標或給銀一二萬兩或給銀數千兩按兵丁之數分別銀兩之多寡亦著怡親王大學士等酌量派定其銀卽交與各該督撫提督委員料理以惠濟兵丁一切照駐防之例行其前後委任之時將此造冊內查核至於各省鎮標兵丁等一時難以徧及量國用之出入次第加恩陸續降旨特諭

上諭訓練營伍之道必技藝精熟方有濟於實用聞直隸地方營汛中鎗手演習時止放空鎗從未裝入鉛子打把一次似此則信手高低漫無準則何由純熟而成必中之技直隸幾處如此則通省可知直隸一省如此則外省可知嗣後著通行直省督撫提鎮等轉飭所屬於練習火器之時用鉛子打把演熟準頭則火器皆成利用於營伍

實有裨益特諭

上諭火器關係軍政甚爲緊要烏鎗硝磺不許民間藏匿向來例禁甚嚴乃外省奉行不力視爲具文前有人在打箭爐見西藏番民來爐貿易者所帶烏鎗俱係內地製造款式又有人在天全土司查出烏鎗九十餘桿似此則不法之民私造烏鎗希圖獲利違禁販賣者不少矣川省如此則他省可知著各該督撫留心訪察實力奉行嚴加申禁毋得因循塞責怠忽從事致干重譴特諭

上諭游惰之民自昔治天下之所深惡若好爲賭博之人又不止於游惰而已荒棄本業廢盡家貲品行日卽於卑汙心術日趨於貪詐父習之則無以訓其子主習之則無以制其奴鬪毆由此而生爭訟由此而起盜賊由此而多匪類由此而聚其爲人心風俗之害誠不可以悉數也大凡爲不善之事者雖干犯功令猶可得微利於一時而

獨至賭博則今日之所得明日卽未必能保若合一年數月而計之勝者與負者同歸於盡此天下人所共知者無如邪僻之人一人其中卽迷而不悟且甘爲下賤而不辭者大可悲矣數年以來屢降諭旨嚴禁而此風尙未止息者則以製造賭具之尙有其人而有司之禁約未曾盡力也百工技藝之事可以獲利營生者何事不可爲而乃違條犯法製此壞風俗惑人心之具其罪尙可言乎嘗思賭博之風所以盛行者父兄爲之子弟見而倣之家主爲之奴僕在旁見而倣之甚至婦人女子亦沈溺其中而不以爲怪總因習此者多故從風而靡者眾也假若嚴行禁止使不敢再犯則日積月累後生子弟無從而見卽無從而學此風自然止息無俟條教號令之煩矣凡地方大吏有司有化民成俗之責而乃悠悠忽忽視爲平常安辭溺職之咎今特定本地官員勸懲之法以清其源嗣後拏獲賭博必窮究

賭具之所由來其製造賭具之家果審明確有證據出於某縣將某縣知縣照溺職例革職知府革職畱任督撫司道等官各降一級畱任如本地有私造賭具之家而該縣能緝獲懲治者著加二級知府著加一級督撫司道等官著紀錄二次將此勸懲之法永著為例於雍正庚戌年爲始著該督撫通行曉諭使城邑鄉村及遠陬僻壤咸使聞知特諭

上諭國家承平日久戶口日繁凡屬閒曠未耕之地皆宜及時開墾以裕養育萬民之計是以屢頒諭旨勸民墾種而川省安插之民又令給與牛種口糧使之有所資藉以盡其力今思各省皆有未墾之土加各處皆有願墾之人或以食用無資力量不及遂不能趨事赴工徘徊中止亦事勢之所有者著各省督撫各就本地情形細加籌畫轉飭有司作何勸導之法其情願開墾而貧寒無力者酌動存公銀

穀確查借給以爲牛種口糧俾得努力於南畝俟成熟之後分限三年照數還項五年後按則起科總在該督撫等統率州縣因地制宜實心經理務使田疇日闢耕鑿惟勤以副朕愛養元元之至意特諭

增謹

上諭直省各處富戶其爲士民殷實者或由祖父之積累或己身之經營操持儉約然後能致此饒裕此乃國家之良民也其爲鄉紳有餘者非由於先世之畱遺卽己身之俸祿制節謹度始能成其家計此乃國家之良吏也是以紳衿士庶中之家道殷實者實居五福之一而爲國家所愛養保護之人則爾等本身安可不思孳孳爲善以永保其身家乎夫保家之道若奢侈靡費固非所以善守而慳吝刻薄亦非所以自全周禮以鄉三物教萬民有曰孝友睦婣任卹可知公財行惠任卹之義與孝友而並重者也蓋凡民之情賤者忌人之貴



貧者忌人之富彼窮乏之人既游閒破耗自困其生又皆不知己過轉懷忌於溫飽之家若富戶復以慳吝刻薄爲心腹削侵牟與小民爭利在太平盛世年穀順成之時固可相安從來遇荒歉之時貧民肆行搶奪先眾人而受其害者皆爲富不仁之家也迨富家被害之後官法究擬必將搶奪之貧民置之重典是富戶以斂財而傾其家貧民以貪利而喪其命豈非兩失之道大可憫惻者乎朕爲此勸導各富戶等平時當以體卹貧民爲念凡鄰里佃戶之窮乏者或遇年穀歉收或值青黃不接皆宜平情通融切勿坐視其困苦而不爲之援手如此則富戶濟貧民之急貧民感富戶之情居常能緩急相周有事可守望相助伎求之念既忘親睦之心必篤豈非富戶保家之善道乎從來家國一理若富戶能自保其身家貧民知共衛夫富戶一鄉如此則一鄉永靖一邑如此則一邑長寧是富戶之宣力於國

也朕臨御以來屢經人條奏民間貧富不均請行限田之法乃至逆賊曾靜私著謗書謂方今輕徭薄賦惟利於豪強兼併之家與貧民無涉非復行井田不能養贍百姓等語朕思此等怪謬支離之說乃理勢所萬不能行者夫天下富者一而貧者百以一人之有餘欲濟眾人之不足貧者未必便能成立而富戶無辜已受摧殘矣此乃懷欲窮天下之賊論有此情理乎朕既知其必不可行若但令地方出示曉諭陽奉陰違朕實恥而不爲若以不能行之事委之各省督撫以示德於貧民使之感朕恩意而以奉行不力之故歸怨於各督撫等又朕所不忍爲者是以特頒諭旨告誡爾等富戶爲富戶者當知己之得於天者甚厚當存濟人利物之心行救困扶危之事敦睦宗族周卹鄉鄰下逮佃戶傭工皆加惠養則人人感其德意即可消患於未萌況積善之家必有餘慶種福果於天地之間子孫必長享豐

厚豈不美歟著各省督撫將朕此旨通行該屬之鄉紳士民人等共

上諭

自古帝王致治誠民莫不以重農為首務書陳無逸先知稼穡之

艱難詩載豳風備敘田家之力作論語云百姓足君孰與不足孟子

云民事不可緩也蓋國以民為本民以食為天農事者帝王所以承

天養人久安長治之本也我國家撫綏寰宇

聖祖

仁皇帝臨御六十餘年深仁厚澤休養生息戶口日增生齒益繁

而直省之內地不加廣近年以來各省皆有收成其被水歉收者不

過州縣數處耳而米價遂各覺漸貴閩廣之間頗有不敷之慮望濟

於鄰省良由地土之所產如舊而民間之食指愈多所入不足以供

出是以米少而價昂此亦理勢之必然者也夫米穀為養命之寶既

賴之以生則當加意愛惜而不可存輕棄之心且資之者眾尤當隨

時樽節而不可縱口腹之欲每人能省一勺在我不覺其少而積少

成多便可多養數人若數人如此則所積豈不更多所養豈不更眾

乎養生家以食少為要訣固所以頤神養和亦所以節用惜福也況

脾主於信習慣便成自然每見食少之人其精神氣體未嘗不壯此

顯而可見者至於各省地土其不可以種植五穀之處則不妨種他

物以取利其可以種植五穀之處則當視之如寶勤加墾治樹藝菽

粟安可舍本而逐末棄膏腴之沃壤而變為果木之場廢養飧之恆

產以倖圖贏餘之利乎至於烟葉一種於生人日用毫無裨益而種

植必求肥饒善地尤為妨農之甚者也小民較量錙銖且但顧目前

不為久遠之計故當圖利之時若令其舍多取寡移重就輕必非其

情之所願而地方官遽繩之以法則勢有所難行轉滋紛擾惟在良

有司勤勤懇懇諄切勸諭俾小民豁然醒悟知稼穡為身命之所關

非此不能生活而其他皆不足恃則羣情踊躍不待督課而皆盡力於南畝矣朕聞江南江西湖廣粵東數省有一歲再熟之稻風土如此而仍於乏食者是地土之力有餘而播植之功不足豈非小民習於怠惰而有司化導者有未至耶或者曰米穀太多則價賤而難於糶賣昔人有穀賤傷農之說諺語所謂熟荒者此則不必過慮假若小民勤於耕作收穫豐盈至價賤而難於出糶朕必多發官價以糶買之使重農務本之良民獲利而有餘貲也朕生平愛惜米穀每食之時雖顆粒不肯拋棄以朕玉食萬方豈慮天庾之不給而所以如此樽節愛惜者實出於天性自然之敬慎並不由於勉強且以米穀乃

上天所賜以生養萬民者朕爲天下生民主惟有敬謹寶重仰冀天心默佑雨暘時若歲獲有秋俾小民家有蓋藏人歌樂土朕旣爲億

萬生民計不敢輕忽天貺爾等紳衿百姓獨不自爲一身一家之計乎朝夕生養之需旣受

上天之賜若果加意愛惜隨時樽節則天心頻頻賜賚長享盈寧之福若恣情縱欲暴殄天物則必上天怒不蒙賜賚而水旱災禔之事皆所不免其理豈有爽哉又聞江西廣西地方竟有以米穀飼養豚豕者試思穀食之與肉食孰重孰輕孰急孰緩而乃以

上天之所賜小民終歲勤苦之所獲者爲豢養物類之用豈不干天和而輕民命乎朕所以惓惓訓諭者惟期天下之人專務本業以杜浮靡愛惜物力以圖久遠共體朕敬迓

天庥勤恤民隱之意則爾等家室必益至於豐饒爾等子孫必永綿其福澤思之毋忽朕言著將此曉諭內外官民人等並通行遠鄉僻壤咸使聞知特諭



